

四庫全書

經部

欽定四庫全書

經部  
禮記

集言卷上

詳校官通政使<sub>臣</sub>夢吉

給事中<sub>臣</sub>溫常綬履勘

總校官編修<sub>臣</sub>王燕緒

校對官中書<sub>臣</sub>潘奕雋

謄錄監生<sub>臣</sub>汪元亮

欽定四庫全書

禮記纂言卷十一

元 吳澄 撰

雜記

此篇混記諸侯大夫士喪之雜禮其事瑣碎  
不與喪謂雜衣兼也事非喪禮者亦附記焉

復諸侯以衰衣冕服爵弁服

喪保毛切

鄭氏曰復招魂復魄也冕服者上公五侯伯四子男

三男衣衾命為諸侯皮朝覲加賜之衣也衰猶進也

孔氏曰諸侯用衰衣又以冕服爵弁服而復也冕服  
者上公自衰冕而下故為五侯伯自鷩冕而下故為

四子男自毳冕而下改爲三也凡服各依其命數則上公五冕之外更加爵弁服以下皮弁冠弁之等而滿九侯伯冕服之外亦加爵弁以下而滿七子男冕服之外加爵弁皮弁而滿五其褻衣君特所褻賜則宜在命數之外也或是冕之最上者

夫人稅衣揄狄稅素沙

稅它喚切  
揄音遙

鄭氏曰言其招魂用稅衣上至揄狄也狄稅素沙言皆以白紗縠爲裏素沙若今紗縠之帛六服皆袍制不禪以素沙裏之如今袷袍襪重縐矣孔氏曰此明婦人復衣婦人衣有六夫人謂諸侯伯夫人也狄稅言揄狄以下至於稅衣不禪謂衣裳有表有裏似漢時袷袍下之襪以重縐爲之也

內子以鞠衣褻衣素沙下大夫以禮衣其餘如士

禮張  
戰切

鄭氏曰內子卿之適妻也下大夫謂下大夫之妻禮周禮作展王后之服六唯上公夫人亦有禕衣侯伯夫人自揄狄而下子男夫人自闕狄而下卿妻自鞠衣而下大夫妻自展衣而下士妻稅衣而已衰衣者始爲命婦見加賜之衣也孔氏曰此明卿大夫以下之妻復衣始命爲內子上所褒賜之衣曰褒衣卽鞠衣也復時亦用此衣亦以素紗爲裏其餘如士謂鞠衣禮衣之外其餘祿衣如士之妻士妻既用祿衣而復則內子下大夫妻等亦用祿衣也

## 復西上

鄭氏曰北面而西上陽長左也復者多少各如其命之數孔氏曰凡招魂皆北面而招以西頭爲上招魂冀生氣之來生氣爲陽又北面言之南方是陽左在西方按士喪禮復者一人諸侯之士一命而用一人

復者各依命數也方氏曰復北面求諸幽故西為上西北皆陰故也

○諸侯行而死於館則其復如於其國如於道則升其

乘車之左轂以其綏復

綏耳佳切

鄭氏曰館主國所致舍主國館賓與使有之得升屋招用褻衣如於其國也道道上廬宿也升車左轂象升屋東榮綏當為綏綏謂旌旗之旄也去其旒而用之異於生也孔氏曰五等諸侯朝觀天子及自相朝會死於主國有司所受館舍則復魄之禮與在己本國同若諸侯在道路死升其所乘車左邊轂上而復魄車轅向南左轂左東也不於道路廬宿之舍復者廬宿供待衆賓非死者所專有也若在國中招魂則用其衣服今在路死則招用旌旗之綏亦冀魂魄望見識之而還也王喪於國亦用綏周禮夏采云建綏

復於四郊是也山陰陸氏曰綏旒也以其旒復旒北方之物也死無乎不之號而復之則其旗宜以死者所首之方廬陵胡氏曰禮言綏凡數處鄭皆讀為綏竊謂王制明堂位夏采所云讀作綏可也此復魄旒在車當从執綏之綏杜子春說是鄭意蓋謂夏采建綏以復不知彼王禮也

其輅有綖緇布裳帷素錦以爲屋而行至於廟門不毀

牆遂入適所殯唯輅爲說於廟門外

輅千見切祓昌占切說吐奪切

鄭氏曰輅載柩將殯之車飾也將葬載柩之車飾曰柳祔謂斂甲邊緣緇布裳帷圍棺者也裳帷用緇則輅用赤矣輅象宮室屋其中小帳襯覆棺者若未大斂其載尸而歸車飾皆如之廟所殯宮牆裳帷也適所殯謂兩楹之間去輅乃入廟門以其入自有宮室也凡柩自外來者正棺於兩楹之間尸亦俛之於此

皆因殯焉異者柩入自闕升自西階尸入自門升自  
阼階其殯必於兩楹之間者以其不死於室而自外  
來留之於中不忍遠也孔氏曰輅謂載柩之車四旁  
有物袂垂象斂甲邊緣也輅下棺外用緇色之布以  
爲裳惟於此裳惟之中又用素錦以爲屋小帳以覆  
棺設此飾而後行也至廟門不毀去裳帷遂入殯宮  
殯焉餘物不說唯輅一物說於殯宮門外廬陵胡氏  
曰裳用緇則輅與袂皆赤也以玄纁對爾鄭謂輅如  
綉旆之綉取舊赤也按大夫以白布爲輅豈亦因染  
赤得名乎柩車飾經惟此文則知未大斂前車飾  
然亦

大夫士死於道則升其乘車之左轂以其綏復如於館  
死則其復如於家



鄭氏曰綬亦綬也大夫復於家以玄冕士以爵弁服

大夫以布爲輶而行至於家而說輶載以輶車入自門

至於阼階下而說車舉自阼階升適所殯

輶車市專切

鄭氏曰大夫輶言用布白布不染也不言裳帷俱用布無所別也至門亦說輶乃入言載以輶車入自門明車不易也輶讀爲輶許氏說文解字曰有輻曰輪無輻曰輶周禮又有蜃車天子以載柩蜃輶聲相近其制同乎輶崇蓋半乘車之輪諸侯言不毀牆大夫士言不易車互相明也不易者不易以輶也廟中有載柩以輶之禮此不爾孔氏曰大夫以白布爲輶不以蒨草染之初死及至家皆以輶車至家說輶唯輶車在故云載以輶車說車說去其車也舉自阼階下而升適兩楹之間所殯之處此謂尸若柩則升自西

階也天子諸侯載柩以蜃車其殯時則易以輶大夫士在路載以輶車至家說輶亦載以輶車故鄭云車不易也凡在路載柩天子以下至士皆用蜃車其制與輶車同周禮遂師共蜃車之役是天子也既夕云遂匠納車于階間注云蜃車是士也此云輶車謂大夫也諸侯不言可知其蜃車之形車之輦狀如牀中夾有輶前後出設輶輦輶輦上有四周下則前後有軸以輶爲輪迫地而行其輪卑有似於蜃故鄭云半乘車之輪乘車輪六尺有六寸半之得三尺三寸也輶車不用輶爲輪天子諸侯殯皆用之天子菆塗龍輶謂畫輶輶爲龍諸侯殯亦用輶車輶不畫龍大夫殯不用輶士殯掘埵見衽是亦廢輶也其朝廟大夫以上皆用輶士朝廟用輶軸輶與輶軸所以異者大夫諸侯以上有四周謂之輶輶軸則無四周軸狀如轉轆刻兩頭爲輶輶狀如長牀穿程前後著金而關軸焉廬陵胡氏曰大夫無爲屋之文則是素錦帳同

諸侯  
矣

士輶葦席以爲屋蒲席以爲裳帷

鄭氏曰言以葦席爲屋則無素錦爲帳孔氏曰士輶用葦席屈之以爲輶棺之屋蒲席以爲裳帷圍繞於屋旁也然大夫無以它物爲屋之文則是用素錦爲帳矣既有素錦爲帳帳外上有布輶旁有布裳帷士之葦席屋之外旁有蒲席裳帷則屋上當以蒲席爲輶覆於上但文不備也方氏曰大夫以布爲輶則諸侯用帛可知士以葦席爲屋則不得用素錦矣蒲席爲裳則不得用緇布矣此皆降殺之別也

○爲君使而死公館復私館不復公館者公宮與公所

爲也私館者自卿大夫以下之家也

爲云偏切  
使色事切

鄭氏曰公所爲君所作離宮別館也

### 右記復凡三節

君訃於它國之君曰寡君不祿敢告於執事夫人曰寡

小君不祿大子之喪曰寡君之適子某死

大音泰適音的

鄭氏曰君夫人不稱薨告它國君謙也孔氏曰曲禮云諸侯曰薨士曰不祿夫人尊與君同以告它國之君不敢從君及夫人之禮謙退同士稱按曲禮壽考曰卒短折曰不祿臣子於君父雖眉壽考終猶若短折然故云不祿卒是終沒之辭若君薨而訃曰卒是壽終矣斯無哀惜之心非臣子之辭鄰國書以卒者言無老幼皆終成人之志所以相尊敬不敢指斥鄰國君身故云告于執事夫人大子皆當云告于執事

不言者畧也山陰陸氏曰凡諸侯同盟則計不同盟蓋不計也君雖壽考猶以不祿計臣子之意也

凡計於其君曰君之臣某死父母妻長子曰君之臣某

之某死

長之  
兩切

鄭氏曰計或作赴赴至也計於其君謂臣死其子使人至君所告之也君之臣某之某死此臣於其家喪所主者孔氏曰某之某上某是生者臣名下某是臣之親屬死者

大夫計於同國適者曰某不祿計於士亦曰某不祿計於它國之君曰君之外臣寡大夫某死計於適者曰吾子之外私寡大夫某不祿使某實計於士亦曰吾子之

外私寡大夫某不祿使某實

適音敵實音至一如字

鄭氏曰適讀爲匹敵之敵謂爵同者實當爲至周秦人聲之誤也孔氏曰此明大夫計告之禮同國敵者謂大夫位相敵者大夫既尊於士士處亦稱不祿稱某者或死者名或死者官號而計者得稱之計於它國之君故云外臣自謙退無德故云寡大夫尊敵它君故云某死計於它國大夫私有恩好故曰外私以計大夫其辭得申故云某不祿以身計告故曰使某至計於士與大夫同方氏曰士曰不祿非士亦曰不祿者謙辭也與死者有恩私故曰外私使某實謂以事實來告劉氏曰實者以異國傳聞疑言使人實之也

士計於同國大夫曰某死計於士亦曰某死計於它國

之君曰君之外臣某死訃於大夫曰吾子之外私某死訃於士亦曰吾子之外私某死

孔氏曰此論士喪相訃告之稱士賤訃大夫及士皆云某死若訃他國之君及大夫士等云某死但於它君大夫士稱外臣外私爾

### 右記訃凡一節

天子飯九貝諸侯七大夫五士三

飯扶晚切

鄭氏曰此蓋夏時禮也周禮天子飯舍用玉孔氏曰典瑞云大喪共飯玉舍玉禮戴說天子飯以珠舍以玉諸侯飯以珠大夫士飯以珠舍以貝皆非周禮並夏殷之法左傳成十七年子叔聲伯夢食瓊瑰哀十

一年齊陳子行命其徒具舍玉此等皆是大夫而以珠玉爲舍者以珠玉是所舍之物故言之非謂當時實舍用珠玉也山陰陸氏曰士喪禮貝三實于筭此士三之證也按珠玉曰舍玉貝亦曰舍則散言之飯舍通也鄭氏謂蓋夏時禮周禮天子飯舍用玉誤矣典瑞言玉職也貝非所言大戴禮天子飯以珠舍以玉諸侯飯以珠大夫士飯以珠舍以貝典瑞大喪共飯玉舍玉則珠有以玉爲之者矣玉府所謂珠玉是也諸侯言飯不言舍則蒙上舍以玉可知然則飯以珠不必言矣其言之則以天子珠兼以玉諸侯以珠而已稽命徵曰天子飯以珠舍以玉諸侯飯以珠舍以璧相脩也相脩而天子言玉諸侯言璧璧器也盧陵胡氏曰春秋時子叔聲伯陳子行臣飯舍僭君疑衰周時禮鄭謂此等夏殷禮無所依據又檀弓飯用米貝鄭不疑於夏殷獨疑此何也



○鑿巾以飯公羊賈爲之也

鄭氏曰記士失禮所由始也士親飯必發其中大夫以上賓爲飯馬則有鑿巾孔氏曰飯舍也大夫以上貴政使賓爲其親舍恐尸爲賓所憎穢故設巾賓尸面而當口鑿穿之令舍得入口也士賤不得使賓子自舍其親但露面而舍耳鑿巾則是自憎穢其親故爲失禮也山陰陸氏曰禮士舍巾不鑿至公羊賈始鑿之以舍君子有取焉禮因時損益故有先王未之有者

○公襲卷衣一玄端一朝服一素積一纁裳一爵弁二

玄冕一褰衣一朱綠帶申加大帶於上

卷音袞

孔氏曰此明襲用衣稱公襲以上服在內公身貴故以上服親身欲尊顯加賜故褰衣最外而細服居中

也玄端者燕居玄端朱裳也朝服者緇衣素裳日視朝之服也素積者皮弁視朔之服纁裳者冕服之裳亦可驚毳任取中間一服也爵弁二者玄衣纁裳此始命之服重本故二通也玄冕之下又取一也褻衣最上華君賜也自卷衣至此合爵弁二通合九稱朱綠帶者以素爲之飾以朱綠此衣之小帶散在於衣非是摠束其身已用此朱綠小帶結束之重加大帶於革帶之上大帶用素爲之士則二采大夫諸侯皆五采卽率帶也申加者謂於革帶之上重加此大帶也鄭氏曰尊卑襲數不同公襲九稱則諸侯七稱天子十二稱與士襲三稱子羔襲五稱朱綠帶者襲衣之帶亦以素爲之飾之雜以朱綠異於生也申重也重於革帶也革帶以佩韋必言重加大帶者明雖有變必備此二帶也

○率帶諸侯大夫皆五采士二采

率音律

鄭氏曰此謂襲尸之大帶率紕也紕之不加箴功大  
夫以上更飾以五采士以朱綠襲事成於帶變之所  
以異於生孔氏曰率謂爲帶但攝帛邊而熨殺之不  
加箴功異於生也吉時大帶唯有朱綠玄華無五采  
以五采飾之亦異於生也此士天子之士也諸侯之  
士則士喪禮用緇帶鄭以襲衣與生同惟帶與生異  
凡襲事著衣畢加帶乃成故注云成於帶謂尸襲竟  
而著此帶也山陰陸氏曰言大夫以上襲尸其帶皆  
以五采絲率之卽非襲尸  
無率也據士練帶率下辟

○子羔之襲也繭衣裳與稅衣纁衽爲一素端一皮弁

一爵弁一玄冕一曾子曰不襲婦服

衽而占切

鄭氏曰繭衣裳者若今大襦也纁爲繭緇爲袍表之  
以稅衣乃爲一稱稅衣若玄端而連衣裳者大夫而

以纁爲之緣非也唯婦人纁袪禮以冠名服此襲其服非襲其冠曾子譏襲婦服而已玄冠又大夫服未聞子羔冒爲襲之孔氏曰此明大夫襲衣稱數子羔賤故卑服親身繭衣裳者纁爲繭謂衣裳相連而緣續著之也稅謂黑衣也亦衣裳連纁絳也袪裳下緣襪也以絳爲緣繭衣既褻故用稅衣表之合爲一稱故云繭衣裳與稅衣纁袪爲一也素端以素爲衣裳此第二稱也服旣不褻並無別衣表之也皮弁第三稱也十五升白布爲衣積素爲裳也爵弁第四稱玄衣纁裳也玄冕第五稱大夫之上服也纁袪是婦人之服而子羔襲用之故曾子譏之子羔爲大夫無文故注云未聞

○冒者何也所以揜形也自襲以至小斂不設冒則形

是以襲而后設冒也

斂去聲

鄭氏曰言設冒者爲其形人將惡之也襲而設冒言后衍字爾孔氏曰此記者自問答設冒之事未襲之前始死事須沐浴自既襲以後以至小斂之前雖已著衣若不設冒則尸象形見爲人所惡也襲則設冒至小斂則以衣覆於冒上山陰陸氏曰后非衍字

○小斂環經公大夫士一也

鄭氏曰環經者一股所謂纏經也士素委貌大夫以上素爵弁而加此經焉散帶孔氏曰環者周回纏繞之名故知是一股纏經若兩股相交謂之絞親始死孝子去冠至小斂不可無飾士素委貌大夫以上素弁而貴賤悉得加環經故云公大夫士一也

○公視大斂公升商祝鋪席乃斂

鄭氏曰喪大記云大夫之喪將大斂既鋪絞紼衾乃鋪席則君至爲之改始新之也孔氏曰公君也明君臨臣喪大斂禮也臣喪大斂君未至之前主人雖已鋪席布絞紼衾聞君至則主人撤去之君來升堂時商祝更鋪席待君至乃斂榮君來爲新之也亦示若事由君也商祝主斂事者

○小斂大斂啓皆辯拜

辯音偏

鄭氏曰嫌當事來者終不拜故明之也此既事皆拜孔氏曰禮凡當小斂大斂及啓攢之時唯有君來則止事而出拜之若它賓客至則不止事事竟乃卽堂下之位悉偏拜故云皆辯拜也然士若當事而大夫至則士亦爲大夫出下云大夫至絕踊而拜之是也應氏曰小斂以襲其形大斂以韜於棺啓殯以載其柩皆喪事之變節而切於死者之身也生者之痛莫此爲甚賓亦於是拜死者生者故主人皆偏拜以

謝之而致其哀也澄曰應氏謂  
賓亦於是拜死者古無是禮也

○當袒大夫至雖當踊絕踊而拜之反改成踊乃襲於

士既事成踊襲而后拜之不改成踊

鄭氏曰尊大夫來至則拜之不待事已也更成踊者  
新其事也於士士至也事謂大小斂之屬孔氏曰此  
明士有喪大夫及士來弔之禮按檀弓云大夫弔當  
事而至則辭焉謂大小斂時主人不出故辭大夫也  
此是斂已竟當其袒踊故絕踊而拜之也反改成踊  
反還也改更也拜大夫竟反還先位更爲踊而始成  
踊也乃襲謂更成踊訖乃襲初袒之衣也既事既猶  
畢也當上人有大小斂諸事而士來弔則主人畢事  
竟而成踊不卽出拜也士言既事則大夫亦然大夫  
言絕踊則士固不絕踊也成踊畢而襲襲畢乃拜之

不更爲成踊山陰陸氏曰已嘗袒矣大夫至而襲故  
今改襲而袒於士襲而後拜之故不復改袒然則又  
成踊何也蓋居喪凡賓  
客弔客去而歸必踊

○公七踊大夫五踊婦人居間士三踊婦人皆居間

鄭氏曰公君也始死及小斂大斂而踊君大夫士一  
也則皆三踊矣君五日而殯大夫三日而殯士二日  
而殯士小斂之朝不踊君大夫大斂之朝乃不踊婦  
人居間者踊必拾主人踊婦人踊實乃踊孔氏曰此  
明諸侯至士初死在室殯踊節及貴賤踊數公諸侯  
去死日五日而殯則合死日六日也七踊者始死一  
踊明日襲之時又一踊襲明日朝又一踊明日小斂  
朝一踊爲四也其日晚小斂時又一踊是小斂日再  
踊就於前三日爲五也小斂明日朝又踊爲六也至  
明日大斂之朝不踊當大斂時乃踊凡七也大夫三



日殯合死日爲四日始死一明日襲朝一又明日小斂日再小斂明日大斂一凡五也士二日殯合死日數三日也始死一小斂朝不踊至小斂時一又明日大斂一凡三也婦人與丈夫更踊居實主之中間也然親始死及動尸舉柩哭踊無數今云七五三者謂爲禮有節之踊每踊輒三者三爲九而謂爲一也山陰陸氏曰公五日而殯踊七日大夫三日而殯踊五日其始死之日踊既殯之後一日猶踊若士三日而殯踊三日則其既殯之後一日不踊歟三五七然後有間士三踊婦人居間言皆三無又間故也然則婦人居間若公七踊其二日甲一踊又二日乙一踊又二日甲一踊大夫放此方氏曰爲貴者踊則多爲賤者踊則少此重輕之別也

○孔子曰伯母叔母䟽踊不絕地姑姊妹之大功踊

絕於地如知此者由文矣哉由文矣哉

鄭氏曰由用也言知此踊絕地不絕地之情者能用禮文哉能用禮文哉笑之也伯母叔母義也姑姊妹骨肉也山陰陸氏曰疏衰大功文也踊絕不絕情也伯叔母之喪文至而情不至姑姊妹之喪文不至而情至知此者則凡於禮知由於內也澄曰喪禮有情有文誠於中者情也形於外者文也伯母叔母之疏衰期其文隆於大功矣然義服之情輕於骨肉故踊不絕地其哀淺也姑姊妹之大功九月其文殺於疏衰矣然骨肉之情重於義服故絕踊於地其哀深也知此二者則知哀之淺深由乎其中之情也豈由乎外之文矣哉陸說優於鄭注

○嫂不撫叔叔不撫嫂

鄭氏曰遠別也澄曰嫂之於叔叔之於嫂生不通問死不制服皆遠之也故於大斂之時不撫其尸方氏謂撫者撫存之也不解此撫爲撫尸之撫疑非記禮者之意

### ○君不撫僕妾

鄭氏曰略於賤也澄曰君撫大夫及內命婦大夫君撫室老及姪娣仕於家曰僕僕賤於室老者妾賤於姪娣者故恩不及之

### 右記飯蕞踊撫凡十三節

喪冠條屬以別吉凶三年之練冠亦條屬右縫小功以

下左總冠縹纓

屬音燭別彼列切縫音逢縹音藻

鄭氏曰條屬者通屈一條繩若布爲武垂下爲纓屬之冠象大古喪事略也別吉凶者吉冠不條屬也吉冠則纓武異材焉右縫者右辟而縫之小功以下左辟象吉輕也縗纓當爲縗麻帶經之縗謂有事其布以爲纓孔氏曰此明喪冠輕重之制吉冠則纓與武各別喪冠則纓與武共材屬猶著也條屬謂一條繩屈之爲武垂下爲纓以著冠也三年練冠小祥之冠也雖微入吉亦猶條屬與凶冠不異吉冠則褊上辟縫嚮左左爲陽陽吉也凶冠縫嚮右右爲陰陰喪所尚也小功以下輕故縫同吉嚮左也總衰冠治縗不治布冠又用漂治總布爲纓也山陰陸氏曰縗讀如蠶縗之縗縗纓散絲纓也即言絲嫌不散

## 大功以上散帶

鄭氏曰小功總輕初而絞之孔氏曰小斂之後主人拜賓襲經於序束小功以下皆絞之大功以上散此

帶垂不忍卽成  
之至成服乃絞

○朝服十五升去其半而總加灰錫也

去起呂切

鄭氏曰總精麤與朝服同去其半則六百縷而疏也  
又無事其布不灰焉孔氏曰總麻於朝服十五升布  
之內抽去其半以七升半用爲總麻服之衰服也取  
總布又加灰治之則曰錫言錫然滑易也云加灰錫  
明總衰不加灰治布也山陰陸氏曰周書成王會禪  
上天子朝服八十物唐叔荀叔周公太公望朝服七  
十物唐公虞公殷公夏公朝服五十物物縷也據此  
升之精麤不同鄭氏謂八十縷爲升舉其精者也總  
於縷加灰錫  
於布加灰

○大夫之哭大夫弁經大夫與殯亦弁經大夫有私喪

之葛則於其兄弟之輕喪則弁經

與音預

鄭氏曰弁經者大夫錫衰相弔之服也如爵弁而素加環絰私喪妻子之喪也輕喪總麻也大夫降焉弔服而往不以私喪之末臨兄弟孔氏曰謂成服以後大夫往弔哭大夫則身著錫衰首加弁經若未成服前與殯之時身亦弁服而首加弁經也私喪之葛謂妻子之喪至卒哭以葛代麻之後於此之時遭兄弟之輕喪總麻大夫降一等雖不服以骨肉之親亦著弔服弁經而往不以妻子私喪之末服臨兄弟也若成服後則錫衰未成服之前身著素裳而首服弁經

○凡弁經其衰侈袂

鄭氏曰弁經服者弔服也其衰錫也總也疑也侈猶大也袂之小者二尺二寸大者半而益之則侈袂三

尺三寸孔氏曰弔服首著弁經身著錫衰總衰疑衰此三衰大夫以上大作其袂若士則其衰不侈也故周禮司服有玄端素端明士不侈故稱端

○ 執玉不麻麻者不紳麻不加於采

孔氏曰尋常執玉行禮不得服衰麻聘禮已國君薨至於主國衰而出注云於是可以凶服將事彼執玉得服衰經者謂受主君小禮若行聘享大事則吉服自若著麻要經者不得復著大帶故在喪以經代紳弁經之麻不得加於玄衣纁裳之采也鄭氏曰麻謂經也紳大帶也喪以要經代大帶采玄纁之衣采者不麻謂弁經者必服弔服也山陰陸氏曰據此弁經雖服皮弁而經非常服之弁歟弁師王之皮弁會五采

○端衰喪車皆無等

鄭氏曰衣衰言端者玄端吉時常服喪之衣衰當如之喪車惡車也喪者衣衰及所乘之車貴賤同孝子於親一也孔氏曰端正也吉時玄端服身與袂同以二尺二寸爲正而喪衣亦如之以其緇六寸之衰於心前故曰端衰等等差也喪之衣衰及惡車天子至士制度同無等等差之別也喪車凡五等木車始遭喪所乘素車卒哭所乘藻車既練所乘駟車大祥所乘漆車禫所乘

○古者貴賤皆杖叔孫武叔朝見輪人以其杖關轂而

輶輪者於是有爵而后杖也

朝音潮輶胡瓦胡罪胡管三切

鄭氏曰記庶人失禮所由始也叔孫武叔魯大夫叔孫州仇也輪人作車輪之官孔氏曰關穿也輶迴也



作輪之人以扶病之杖關穿車轂中而迴轉其輪於是  
是有爵而后杖以其爵位既尊其杖不鄙褻而許用  
也

○爲長子杖則其子不以杖卽位

鄭氏曰辟尊者孔氏曰其子長子之子祖在不  
厭孫其孫得杖但與祖同處不得以杖卽位

爲妻父母在不杖不稽顙

鄭氏曰尊者在不敢盡禮於私喪孔氏曰此謂適子  
爲妻父母見存不敢爲妻杖又不可爲妻稽顙按喪  
服大夫爲適婦爲喪主父爲已婦之主故父在不敢  
爲婦杖父沒母存爲妻雖得杖而不得稽顙以杖與  
稽顙連文不杖屬父在不稽顙屬母在故云父母在  
不杖不稽顙而范宣子申禮論云在有二義一者生

存爲在二者旁側爲在此云母在謂在母之側爲妻不杖按爲母創杖而問喪云父在不敗杖尊者故也是在謂在側之在此范氏之釋但父母在之文相連爲一而父爲存在之在母爲在側之在范義未安山陰陸氏曰適子爲妻如此則庶子父雖在以杖卽位可也

### 母在不稽顙稽顙者其贈也拜

鄭氏曰言獨母在於贈拜得稽顙則父在贈拜不得稽顙孔氏曰前明父母俱在故不杖不稽顙此明父沒母在爲妻得有稽顙尋常拜賓之法母在爲妻子不稽顙但父沒母在稍降殺於父它人以物來贈已其恩既重拜謝此贈之時得稽顙也故云其贈也拜方氏曰父母在則爲妻不杖不稽顙爲尊者厭不敢盡禮於私喪也父沒母在爲妻亦不稽顙則容杖矣然於拜贈之時亦稽顙焉凡以別於父在之時也

○國禁哭則止朝夕之奠卽位自因也

鄭氏曰禁哭謂大祭祀時雖不哭猶朝夕奠自因自用故事孔氏曰止謂止而不哭自因謂孝子於殯宮朝夕兩奠之時卽降階下位自因其故事而設奠也

○朝夕哭不帷

鄭氏曰緣孝子心欲見殯肆也旣出則施其居鬼神尚幽闇也孔氏曰孝子朝夕進入廟門內哭位之時除去殯宮帷哭竟則帷之

無柩者不帷

鄭氏曰謂旣葬也棺柩已去鬼神在室堂無事焉遂去帷孔氏曰葬後神主祔廟還在室則在堂無事故

不復用惟

○童子哭不偯不踊不杖不菲不廬

偯引豈切  
非扶味切

鄭氏曰童子未成人不能備禮也當室則杖孔氏曰當室謂十五以上若世子生則杖故曾子問云子衰杖成子禮也皇氏云童子當室則備此五事問喪云當室則免而杖舉重言也

右記冠衰經杖哭凡十一節

有殯聞外喪哭之它室

鄭氏曰哭之它室明所哭者異也哭之爲位孔氏曰有殯謂父母喪未葬柩在殯宮者也外喪謂兄弟喪在遠者也它室別室若聞外喪哭於殯宮則嫌是哭殯於別室哭之明所哭者爲新喪也

入奠卒奠出改服卽位如始卽位之禮

鄭氏曰謂後日之哭朝入奠於其殯既乃更卽位就它室如始哭之時孔氏曰明日之朝著重喪之服入奠殯宮及下室卒奠而出改已重喪服著新死未成服之服卽它室之位如昨日聞喪卽位時也

○大夫士將與祭於公既視濯而父母死則猶是與祭也次於異宮既祭釋服出公門外哭而歸其它如奔喪之禮如未視濯則使人告告者反而后哭

與音預

鄭氏曰猶亦當爲由次於異宮不可以吉與凶同處也使者反而后哭不敢專已於君命也孔氏曰此明大夫士與祭於公而有私喪之禮猶是與祭者既與祭於公祭日前既視濯之後而遭父母喪則猶是吉

禮而與於祭也其時止次異宮不可以吉與凶同處也未視濯前遭父母之喪則使人告君必待告君者反而后哭父母也廬陵胡氏曰猶是言自若也

如諸父昆弟姑姊妹之喪則既宿則與祭卒事出公門釋服而后歸其它如奔喪之禮如同宮則次于異宮

鄭氏曰宿則與祭出門乃解祭服皆爲差緩也孔氏曰既宿謂祭前三日將致齊之時既受宿戒雖有期喪則與公家之祭若諸父昆弟姑姊妹等同宮而死則既宿之後出次異宮按前遭父母之喪既視濯而與祭此期喪宿則與祭前遭父母之喪既祭釋祭服乃出公門此期喪出門乃解祭服以期喪緩於父母山陰陸氏曰歸而后哭亦以此

○凡異居始聞兄弟之喪唯以哭對可也

鄭氏曰惻怛之痛不以辭言爲禮也孔氏曰此明異居聞兄弟喪之禮凡非一之辭異居別所而始聞兄弟之喪惻怛情重不暇問餘事惟哭對使者於禮可也

其始麻散帶經未服麻而奔喪及主人之未成經也疏者與主人皆成之親者終其麻帶經之日數

鄭氏曰散帶垂與居家同也凡喪小斂而麻疏者謂小功以下也親者大功以上也疏者及主人之節則用之其不及亦自用其日數孔氏曰大功以上兄弟其初聞喪始服麻之時散垂要之帶經若小功以下服制則糾垂不散也若聞喪未及服麻而卽奔喪道路旣近至在主人未成經時謂未小斂之前也疏者

值主人成服之節則與主人成之親者雖值主人成服未即成之必終竟其麻帶經依禮日數滿而后成服奔喪之後至三日而成服也按奔喪禮聞喪即襲經絞帶不散彼謂有事未即奔喪故也又奔喪禮至即絞帶不散垂彼謂來遲此即來奔故至猶散麻以見尸柩故也

○聞兄弟之喪大功以上見喪者之鄉而哭

鄭氏曰奔喪節也孔氏曰此明奔兄弟喪之法見喪者之鄉而哭謂親兄弟同氣及同堂兄弟也奔喪禮云齊衰望鄉而哭大功望門而哭謂降服大功者如此則兄弟之名通輕重也

○適兄弟之送葬者弗及遇主人於道則遂之於墓

鄭氏曰言骨肉之親不待主人也孔氏曰此兄弟通總小功也適往也謂往送五服之親不及喪柩在家



主人葬竟已還送葬之人值於路  
不得隨孝子歸仍自獨往於墓也

○凡主兄弟之喪雖疏亦虞之

鄭氏曰喪事虞祔乃畢孔氏曰疏謂小功總麻彼既  
無主雖服總小功之疏亦爲之主虞祔之祭按小記  
云大功者主人之喪有三年者則必爲之再祭鄭注  
云小功總麻爲之練祭可也與此不同者彼承大功  
有三年者此則總小功有三年者故至小祥同於三  
年故主虞祔也今此言疏者亦虞但虞者謂無服者  
朋友相爲  
亦虞祔也

○姑姊妹其夫死而夫黨無兄弟使夫之族人主喪妻  
之黨雖親弗主

鄭氏曰此謂姑姊妹無子寡而死也夫黨無兄弟無  
總之親也其主喪不使妻之親而使夫之族人婦人  
外成必宜得  
夫之姓類

夫若無族矣則前後家東西家無有則里尹主之

鄭氏曰喪無無主也里尹閭胥里宰之屬諸侯弔於  
異國之臣則其君爲主里尹主之亦斯義孔氏曰按  
周禮六遂之內二十五家  
爲里里置一宰下士也

或曰主之而附於夫之黨

鄭氏曰妻之黨自主之非也夫之黨其祖姑也朱子  
曰古法旣廢鄰家里尹決不肯祭它人之親則從宜  
而祀之別  
室其可也

○主妾之喪則自祔至於練祥皆使其子主之其殯祭不於正室

鄭氏曰祔自爲之者以其祭於祖廟孔氏曰妾既卑賤得主之者謂女君死攝女君也祔祭於祖姑尊祖故自祔也妾合祔於妾祖姑無妾祖姑則祔於女君雖攝女君猶下正適故殯之與祭不得在正室妾祖姑無廟於廟中爲壇祭之若不攝女君之妾則不得爲主別爲壇不在祖廟中而子自主之也方氏曰妾之喪祔於妾祖姑之廟故其夫自主而祔之非尊妾也尊祖而已練祥則使其子者略之也殯祭不於正室者所以明嫡也山陰陸氏曰言主妾之喪則自祔則妾之喪其主有不主者矣

○士之子爲大夫則其父母弗能主也使其子主之無

子則爲之置後

爲之云  
偏切

鄭氏曰大夫之子得用大夫之禮而士不得也置猶立也孔氏曰士子身爲大夫父身是士故不可爲大夫喪主使此死者之子爲主以其是大夫適子故得服大夫服爲之主也若無適子則以庶子當適處若無庶子則以族人之子當適處皆得用大夫禮此所置之後謂暫爲喪主假用大夫禮若大宗子則直爲立後自然用大夫禮也父是士則不得主大夫喪所以然者父貴可以及子故大夫之子得用大夫之禮子貴不可以及父故其父不得用大夫之禮

○大夫爲其父母兄弟之未爲大夫者之喪服如士服  
士爲其父母兄弟之爲大夫者之喪服如士服

爲其云  
偏切

方氏曰生者貴而死者賤則其服從死者嫌若臨之故也生者賤而死者貴則其服從生者嫌若潛之故也鄭氏曰大夫雖尊不以其服服父母兄弟嫌若踰之也士謂大夫庶子爲士者也已卑又不敢服尊者之服今大夫喪禮逸與士異者未得而備聞也春秋傳齊晏桓子卒晏嬰簾衰斬直經帶杖菅屨食粥居倚廬寢苦枕草其老曰非大夫之禮也曰唯卿爲大夫此平仲之謙也言已非大夫故爲父服士服爾麤衰斬者其縗在齊斬之間謂縗如三升半而三升不緝也斬衰以三升爲正微細焉則屬於麤也然則士與大夫爲父服異者有麤衰斬枕草矣其爲母五升縗而四升爲兄弟六升縗而五升乎唯大夫以上乃能備儀盡飾士以下則以臣服君之斬衰爲其父以臣從君而服之齊衰爲其母與兄弟亦以勉人爲高行也大功以下大夫士服同孔氏曰大夫之父母兄弟或作士或無官今大夫若爲之著大夫之服是自

尊踰越父母兄弟也士是大夫庶子者若大夫適子雖未爲士猶服大夫之服王氏云喪禮自天子以下無等春秋之時尊者尚輕簡喪服禮制遂壞羣卿專政晏子惡之故服麤衰枕草於當時爲重孟子謂三年之喪齊疏之服飭粥之食自天子達於庶人三代共之此記謂端衰喪車皆無等平仲不以己之是駭人之非遜辭以辟咎也其大夫與士異者大夫以上在喪斂時介經士冠素委貌石林葉氏曰古者喪服大夫士必有異制禮經皆不載鄭氏引晏平仲居桓子喪其老以爲非大夫禮爲證父母兄弟之未爲大夫者服士服蓋不欲以尊踰之也而桓子亦大夫矣晏氏之老以爲非大夫禮則平仲之服士服也當時諸國蓋多行短喪而況其服是以平仲矯之不欲片人之過姑自抑答以卿然後爲大夫大夫與士之禮其必以精麤爲辨歟山陰陸氏曰古者士服斬衰三升寢苦枕塊則大夫麤衰斬寢苦枕草是歟當晏子

時士偕大夫大夫以上喪服益輕故嬰反古之道家  
老視時以爲非也閭傳曰斬衰三升齊衰四升五升  
六升齊衰四升蓋士以下則五升大夫六升諸侯天  
子齊衰之別也若斬衰則兩等喪服所謂衰三升三  
升有半三升有半大  
夫以上服斬之衰歟

### ○大夫之適子服大夫之服

鄭氏曰仕至大夫賢者而德成適子得服其服亦尊  
其適象賢孔氏曰父官至大夫適子雖未仕得服大  
夫之服爲其能象似父之賢也皇氏云大夫適子若  
爲士爲其父唯服士服鄭注仕至大夫謂此子若仕  
官至大夫始得服大夫服以其賢  
德著成也澄按皇說疑非鄭意

### ○大夫之庶子爲大夫則爲其父母服大夫服其位與

未爲大夫者齒

爲其云  
偽切

鄭氏曰雖庶子得服其服尚德也使齒於士不可不宗適孔氏曰大夫庶子仕至大夫由其身有德行所以得服大夫之服其行位之處齒列於適子之下年雖長於適子猶在適子之下使適子爲主若年少於適子則固在下是宗適也方氏曰大夫之適子雖爲士服大夫之服而不嫌於重者適故也至於庶子身爲大夫雖服大夫之服其位猶與未爲大夫者齒蓋長幼之序不可以貴賤廢故也

○違諸侯之大夫不反服違大夫之諸侯不反服

鄭氏曰其君尊卑異也違猶去也去諸侯仕諸侯去大夫仕大夫乃得爲舊君服孔氏曰去諸侯謂不便其君及辟仇也之往也已本是諸侯臣往仕大夫是自尊適卑不可反服於前之尊君也本是大夫臣今



仕諸侯是自卑適尊若猶服卑君則爲新君之恥故亦不反服舊君若所仕尊卑敵則反服舊君服齊衰三月方氏曰或違尊而之卑或違卑而之尊皆不敢反服於舊君者以尊卑異體故也清江劉氏曰此言違而仕者則不反服舊君避新君也然則違而未仕者聞舊君之喪則反服爾春秋傳所謂未臣焉有伐其國者反死之可矣旣臣焉而反死之則不可卿士云去諸侯仕諸侯去大夫仕大夫乃得爲舊君服非也

○孔子曰管仲遇盜取二人焉上以爲公臣曰其所與遊辟也可人也管仲死桓公使爲之服宦於大夫者之爲之服也自管仲始也有君命焉爾也

鄭氏曰可人也言此人可也但居惡人之中使之犯法宦猶仕也此仕於大夫更升於公與違大夫之諸侯同爾禮不反服孔氏曰管仲於盜中簡取二人薦上以爲桓公之臣謂此盜人所與交遊是邪辟之人故爲盜其人性行是堪可之人也依禮仕於大夫升爲公臣不合爲大夫著服管仲死桓公使此二人著服自此升爲公臣者皆服宦於大夫之服記失禮所由山陰陸氏曰爲其所爲主服與違大夫之諸侯不同蓋世衰道微君不能教始服其師君不能舉而所爲主者有服矣

○外宗爲君夫人猶內宗也

爲云僞切後同

鄭氏曰皆謂嫁於國中者爲君服斬夫人齊衰不敢以其親服服至尊也外宗謂姑姊妹之女舅之女及從母皆是也內宗五屬之女也其無服而嫁於諸臣者從爲夫之君嫁於庶人從爲國君孔氏曰君內宗

爲君悉服斬衰爲夫人齊衰則君外宗之女爲君及夫人與內宗同故云猶內宗也按禮族人不敢以其戚戚君則異族者亦不可以戚戚君故不以其親服服至尊也鄭知嫁於國中者以經云爲君夫人是國人所稱號故也國外當云諸侯古者大夫不外取故君之姑姊妹嫁於國內大夫爲妻是其正也舅之女及從母在國中非正也諸侯不內取舅女及從母不得在國中諸侯雖曰外取舅及從母元在它國而舅之女及從母不得來嫁與己國卿大夫爲妻以卿大夫不外取也內宗外宗嫁在它國皆爲本國諸侯服斬或云在它國則不得也此外宗與喪服外宗爲君別也故鄭注彼云外宗是君之外親之婦此外宗惟據君之宗

○女君死則妾爲女君之黨服攝女君則不爲先女君

之黨服

鄭氏曰妾於女君之親若其親然孔氏曰雖是徒從而抑妾故爲女君黨服防覲覲也攝女君差尊故不爲先女君之黨服山陰陸氏

曰卽不言先嫌女君或出

右記聞喪奔喪主喪服喪凡十六節

諸侯使人弔其次舍祔贈臨皆同日而畢事者也其次

如此也

舍胡暗切祔音遂  
贈芳鳳切臨如字

孔氏曰諸侯使人弔鄰國先行弔禮宣君命人以飲食爲急故舍次之食後須衣故祔次之有衣卽須車馬故贈次之君事既畢則臣行私禮故臨在後事雖多同一日畢也鄭氏曰言五者相次同時

○弔者卽位于門西東面其介在其東南北面西上西於門主孤西面相者受命曰孤某使某請事客曰寡君使某如何不淑相者入告出曰孤某須矣弔者入主人升堂西面弔者升自西階東面致命曰寡君聞君之喪寡君使某如何不淑子拜稽顙弔者降反位相去聲

鄭氏曰弔者卽位于門西立門外不當門也主孤西面立於阼階下也相者受命受主人命以出也不言擯者喪無接賓也淑善也如何不善言君痛之甚使某弔也稱孤某者其君名君薨稱子某使人知適嗣也須矣不出迎也子孤子也降反位者出反門外位無出字脫孔氏曰此明弔禮門西謂主國大門之西

凶事異於吉故其介在東南北面西上以使在門西  
故也相者相主人傳命者也孤謂嗣子也某爲嗣子  
之名異於吉禮不出迎故云須矣主人升堂謂從阼  
階升也子拜稽顙不云孤某而稱子者客既有事於  
殯故稱子以對殯之辭也以下皆然若對賓之辭則  
稱孤某鄭云喪無接賓故不言擯而言相此對例爾  
若通而言之吉事亦  
云相凶事亦稱擯

舍者執壁將命曰寡君使某舍相者入告出曰孤某須  
矣舍者入升堂致命子拜稽顙舍者坐委于殯東南有  
葦席旣葬蒲席降出反位宰夫朝服卽喪屨升自西階  
西面坐取壁降自西階以東

鄭氏曰舍玉爲璧制其分寸大小未聞言降出反位則是介也春秋有既葬歸舍贈襚無譏焉皆受之於殯宮朝服告鄰國之禮也卽就也以東藏於內也孔氏曰此明舍禮舍者坐委所舍之璧于殯之東南席上未葬之前有葦席承之既葬以後則以蒲席承之宰夫朝服卽喪屨宰謂上卿夫衍字朝服者吉服也以鄰國執玉而來執玉不麻故著朝服不敢純凶待鄰國也以在喪不可純吉故卽喪屨也此遭喪已久故嗣子親受禮宰著朝服若新始遭喪則主人不親受使大夫受於殯宮此弔者旣爲上客又贈者是上介則此舍者襚者當是副介末介但舍襚於死者爲切故在先陳之

襚者曰寡君使某襚相者入告出曰孤某須矣襚者執  
冕服左執領右執要入升堂致命曰寡君使某襚子拜

稽顙委衣于殯東。祔者降受爵弁服於門內。霤將命于拜稽顙如初。受皮弁服於中庭。自西階受朝服自堂受玄端。將命于拜稽顙皆如初。祔者降出反位。宰夫五人舉以東降自西階。其舉亦西面。

要一遙切

鄭氏曰：委衣于殯東亦於席上所委。壁之北順其上。下受祔者以服者。賁人也。其舉亦西面。亦祔者委衣時。孔氏曰：此明祔禮。按上文舍者稱執壁下文贈者稱執圭。則此祔者當稱執衣。不云者文不備也。鄭注順其上下謂上者在前下者在後也。云委衣于殯東又云受爵弁受皮弁玄端皆如初是皆在殯東西面而嚮殯。今云舉者亦西面是亦如祔者西面也。其服重者使執而入爵弁受於內霤。皮弁受於中庭朝服。



受於西階玄端受於堂既受處不同則陳於壁北亦重者在南凡諸侯相褻衣數無文據此其服有五又先路褻衣不以褻以外無文山陰陸氏曰所受服轉卑故其所授轉高也據爵弁服纁裳皮弁服素積玄端玄裳爵弁服尊矣受於門內雷皮弁次之受於中庭朝服又次之自西階受朝服玄端卑矣自堂上受

端玄

上介贈執圭將命曰寡君使某贈相者入告反命曰孤某須矣陳乘黃大路於中庭北執圭將命客使自下

由路西子拜稽顙坐于殯東南隅宰舉以東

乘去聲

鄭氏曰韎韐也自率也下謂馬也馬在路之下覲禮曰路下四亞之客給使者入設乘黃於大路之西客

入則致命矣使或爲史孔氏曰此明贈禮乘黃謂馬也大路謂車也陳四黃之馬於大路之西於殯宮中庭北轡者大路轡轅北轡也客使謂使客之從者爲客所使故曰客使自下由路西者由左也陳路北轅既竟贈客執圭升堂致命而客之從者牽馬設在車之西大路亦使設之也引覲禮證馬爲下也四亞之謂馬四匹亞次路車也贈既夕有奠主於親者故兄弟贈奠此諸侯相與既疏故無奠山陰陸氏曰犬馬不上於堂故執圭將命小行人圭以馬客使率馬者也自下自路下西之前聘禮所謂率馬者自前西乃出是也坐委於殯東不言圭尊圭也

凡將命鄉殯將命子拜稽顙西面而坐委之宰舉璧與圭宰人舉隧升自西階西面坐取之降自西階贈者出

反位于門外

鄉許亮切

鄭氏曰凡者說不見者也鄉殯將命則將命時立於殯之西南宰夫宰之佐也此言宰舉壁與圭則上宰夫朝服行夫字贈者出乃言反位門外明禮畢將更有事孔氏曰此摠明從上以來弔舍襚及贈文不見者鄉殯謂在殯之西南東北面將命既畢子拜稽顙之後將命者來就殯東西面坐委之宰舉壁與圭者主人上卿坐舉舍者之壁與贈者之圭宰夫舉襚謂宰之屬官舉此襚者之衣宰與宰夫欲舉時升自西階不敢當主孤之位來鄉殯東席之東西卿坐取之降自西階也山陰陸氏曰此弔儀也始云寡君使某弔已而曰寡君使某舍寡君使某襚寡君使某贈又曰寡君有宗廟之事不得承事使一介老某相執紼則弔臨舍襚贈皆相將贈賻亦應爾而今不錄不與錄也玩好曰贈貨財曰賻

上客臨曰寡君有宗廟之事不得承事使一介老某相執綽相者反命曰孤某須矣臨者入門右介者皆從之立于其左東上宗人納賓升受命于君降曰孤敢辭吾子之辱請吾子之復位客對曰寡君命某毋敢視賓客敢辭宗人反命曰孤敢固辭吾子之辱請吾子之復位客對曰寡君命某毋敢視賓客敢固辭宗人反命曰孤客對曰寡君命某毋敢視賓客敢固辭宗人反命曰孤敢固辭吾子之辱請吾子之復位客對曰寡君命使臣某毋敢視賓客是以敢固辭固辭不獲命敢不敬從客

立于門西介立于門左東上孤降自阼階拜之升哭與

客拾踊三客出送于門外拜稽顙

顙音弗拾其刼切

鄭氏曰上客弔者也臨視也言欲入視喪所不足而給助之謙也其實爲哭爾臨者入門右不自同於賓客賓三辭而稱使臣爲恭也爲恭者將從其命孤降自阼階拜之拜客謝其厚意不迎而送喪無接賓之禮孔氏曰此明弔舍襚賵既畢上客行臨哭之禮使一介老某相執紼者一介謙辭某者上客名也相助也謙言助主人執其葬紼臨者不敢自同賓故入門右從臣位也宗人納賓升受命于君者主國宗人掌禮欲納此弔賓先受納賓之命於主國嗣君也降曰請復位者宗人下阼階請客復門西客位也反命者反此客之辭命於嗣君也曰孤敢固辭者是宗人受嗣君之命以告客前文云孤某此直云孤者客是使

臣不復稱名也。前四禮客皆在門西。此臨在門東者。前是奉君命而行。此是私禮。若聘禮私覲。故在門東。山陰陸氏曰：臨應親至。故其詞如此。據寡君使某弔使某合。使某祔。使某贈。不云不得承事。其遣上客亦以此贈稱。上介亞於此。歟。若陳乘黃大路於中庭。蓋亦重禮也。言執紼容外客臨有喪而至者也。舍不及斂。不及事矣。祔不及殯。不及事矣。贈不及葬。不及事矣。雖然。猶愈乎否。賓升受命于君。變子稱君容外客臨有不及事。既葬與踰年而後至也。公羊傳曰：君薨稱子某。既葬稱子踰年。稱公其曰孤。降自阼階。則子踰年可知。不名亦以此曲禮曰：居喪之禮。升降不由阼階。

○諸侯相祔以後路與冕服先路與褻衣不以祔

鄭氏曰：不以已之正者施於人。以彼不以爲正也。後路貳車。貳車行在後也。孔氏曰：祔謂以物送死。用後

路謂上路之後次路也冕服謂上冕之後次冕也先路褻衣是已車服之上不可以施人以彼不以爲正服所用也澄曰冕服以襪後路以贈但言相襪者包贈在其中也

○婦人非三年之喪不踰封而弔如三年之喪則君夫人歸夫人其歸也以諸侯之弔禮其待之也若待諸侯然夫人至入自闈門升自側階君在阼其它如奔喪禮然

鄭氏曰踰封越境也君夫人歸奔父母喪也其歸也以諸侯弔禮其待之若待諸侯謂夫人行道車服主國致禮入自闈門升自側階不自同於女賓也宮中之門曰闈門爲相通者也側階旁階其它謂哭踊髻

麻孔氏曰父母三年之喪雖君之夫人歸往奔喪也非三年喪則不歸女子出適爲父母期云三年者以本親言也按喪大記夫人弔於大夫士入自大門升自正階今此不然以女子子是父母之親不可同於女賓之䟽也主國之君在阼階待之不降階而迎言其它如奔喪禮嫌夫人位尊與卿大夫妻奔喪禮異故明之側階謂東旁之旁階

○其國有君喪不敢受弔

鄭氏曰辟其痛傷己之親如君孔氏曰此謂國有君喪而臣又有親喪則不敢受它國賓來弔也以義斷恩哀痛主於君不私於親

右記弔含襚贈臨凡五節



大夫之喪大宗人相小宗人命龜卜人作龜

相息亮切

鄭氏曰卜葬及日也相相主人禮也命龜告以所問事也作龜謂揚火灼之以出兆孔氏曰大夫謂卿大宗謂大宗伯小宗謂小宗伯皇氏云大小二宗並是其君之職來爲喪事故宗伯肆師云凡卿大夫之喪相其禮應氏曰君臣一家也君之喪百官庀其職大夫之喪家臣庀其役其廣狹不同矣君則卹其私而以國有司助之其凡役則司徒供之少儀聽役於司徒是也其贊相則大小二宗與卜人同之宗伯肆師相禮是也大小宗與卜人皆春官而喪事同贊相之益君喪之用大宰大宗大祝若曾子問所記是也而亦以贊大夫之喪其待之厚矣夫臣子之喪其力有不能盡具者皆仰之於公又俾有司贊其事所謂體羣臣者此類是也

○大夫卜宅與葬日有司麻衣布衰布帶因喪屨緇布冠不黹占者皮弁

鄭氏曰有司卜人也麻衣白布深衣而著衰焉及布帶緇布冠此服非純吉亦非純凶皮弁則純吉之尤者也占者尊於有司卜求吉其服彌吉大夫士朔服皮弁孔氏曰宅謂葬地大夫尊故得卜宅并葬日麻衣謂吉服十五升之布深衣布衰謂以三升半布爲衰長六寸廣四寸綴於衣前當脅上後又有負版長一尺六寸廣四寸白布深衣是吉衰是凶布帶亦凶緇布冠是吉不黹亦凶故鄭云非純吉亦非純凶也因喪屨因喪之繩屨也緇布冠古法不黹後代有黹此以凶事故特云不黹占者謂卜龜之人山陰陸氏曰據士冠禮筮日有司如主人服卽位于西方東面北上有司羣吏有事者也鄭氏謂卜人誤矣

如筮則史練冠長衣以筮占者朝服

鄭氏曰筮者筮宅也謂下大夫若士也筮史筮人也長衣深衣純以素也長衣練冠純凶服也朝服純吉服也大夫士曰朝服以朝也孔氏曰士喪禮云筮宅卜日士不合用卜故用筮以筮輕故用純凶服占者用朝服也按士喪禮族長涖卜及宗人吉服彼謂士之下禮服玄端此據筮禮故朝服按士虞禮注云士之屬吏爲其長弔服加麻此史練冠長衣者此文舍大夫以其臣爲大夫布帶繩屨故史練冠長衣若士之下史當從弔服不得練冠長衣也

○祝稱卜葬虞子孫曰哀夫曰乃兄弟曰某卜葬其兄弟曰伯子某

鄭氏曰祝稱卜葬虞者卜葬卜虞祝稱主人之辭也  
孫謂爲祖後者稱曰哀孫某卜葬其祖某甫夫曰乃  
某卜葬其妻某氏兄弟相爲卜稱名而已孔氏曰謂  
卜葬擇日而卜人祝龜所稱主人之辭也虞用葬日  
故并言葬虞子卜葬父則稱哀子某卜葬其父某甫  
乃者言之助也妻卑故假助句以明夫之尊也弟爲  
兄則祝辭云某卜葬兄伯子某兄爲弟則云某  
卜葬其弟某兄弟稱名則子孫與夫皆稱名也

○士喪有與天子同者三其終夜燎及乘人專道而行

乘去聲

鄭氏曰乘人謂使人執引也專道人辟之孔氏曰柩  
遷之夜須光明故竟夜燎也乘人謂人引車不用馬  
也旣夕禮云屬引專道謂喪在路  
不辟人也三事爲重故與天子同

○升正柩諸侯執紼五百人四紼皆銜枚司馬執鐸左八人右八人匠人執羽葆御柩大夫之喪其升正柩也

執引者三百人執鐸者左右各四人御柩以茅引

引以慎切

鄭氏曰升正柩者謂將葬朝于祖正棺於廟也五百人謂一黨之民諸侯之大夫邑有三百戶之制紼引同爾廟中日紼在塗曰引互言之御柩者居前道止之大夫士皆二紼孔氏曰此明諸侯大夫送葬正柩之禮執鐸之差將葬朝於祖廟柩升廟之西階既夕禮云升自西階正柩于兩楹間是也銜枚止喧囂也司馬夏官主武故執金鐸率衆左右各八人夾柩以號令於衆也匠人工人也以鳥羽注於柄頭如蓋謂之羽葆匠人主宮室故執羽葆居柩前御行於道指揮爲進止之節也周禮喪祝御柩謂王禮也此云匠

人諸侯禮也按周禮注六鄉主六引六遂主六綽此云執紼應舉六遂而言黨者正取一黨之人數爾邑有三三百戶之制謂小國中下大夫其實大國下大夫亦三百戶論語伯氏駢邑三百注云伯氏齊大夫是齊爲大國下大夫亦三百家也方氏曰大夫禮殺於諸侯故以茅取其色白宜於凶禮且以表哀素之心焉楚軍前茅亦以兵凶器也

○君若載而后弔之則主人東面而拜門右北面而踊出待反而后奠

鄭氏曰主人拜踊於賓位不敢迫君也君卽位車東出待不必君留也君反之使奠孔氏曰臣喪朝廟柩已下堂載在柩車而君來弔君位於車東故主人在車西東面而拜門謂祖廟門也右西邊也若門外來

則右在東此據車門內出故右在西孝子拜君竟從位立近門內西邊北面而哭踊爲禮也出待者孝子哭踊畢而先出門待君以君來則拜迎去則拜送今君弔事竟不敢必君久留故孝子先出待君出也反而后奠者君使人命孝子反還喪所而后設奠告柩知之或謂此在廟載柩車時奠謂反設祖奠也

○大夫之喪既薦馬薦馬者哭踊出乃包奠而讀書

鄭氏曰嫌與士異記之也既夕禮曰包牲取下體又曰主人之史請讀贈孔氏曰此明大夫將葬柩朝廟後欲出之時也按士喪禮下篇云薦馬凡有三柩初出至祖廟設奠爲遷祖之奠訖乃薦馬一也至日側祖奠又薦馬二也明日將行遣奠時又薦馬三也此薦馬下云包奠而讀書於既夕禮爲第三薦馬時也薦進也馬是牽車爲行之物孝子見進薦馬是行期已至故感之而哭踊馬出乃取遣奠牲下體包裹之

以遣送行也苞者象既饗而歸賓俎士則羊豕各三箇必取下體者下體能行亦示將行也有遣車者亦先包之書謂凡送亡者贈入梓之物書也讀之者省錄之也注引讀贈贈猶送者人名也

○或問於曾子曰夫既遣而包其餘猶既食而裹其餘與君子既食則裹其餘乎曾子曰吾子不見大饗乎夫大饗既饗卷三牲之俎歸于賓館父母而賓客之所以爲哀也子不見大饗乎

夫音扶遣棄戰切與音余卷軌轉切

鄭氏曰言遣既奠而又包之是與食於人已而裹其餘將去何異與君子寧爲是乎言傷廉也既饗歸賓俎所以厚之言父母家之主今賓客之是孝子哀親之去也孔氏曰大饗賓客既畢主人斂三牲俎上之



肉歸於賓館已家父母今日既去遂同賓客之  
疏是孝子所以悲哀也重結前文以語或人

○遣車視牢具疏布綦四面有章置于四隅

章音障

鄭氏曰言車多少各如所包遣奠牲體之數也然則  
遣車載所包遣奠而藏之者與遣奠天子大牢包九  
箇諸侯亦大牢包七箇大夫亦大牢包五箇士少牢  
包三箇大夫以上乃有遣車綦其蓋也四面皆有章  
蔽以隱翳牢肉孔氏曰遣車送葬載牲體之車也牢  
具遣奠所包牲牢之體貴賤各有數也一箇爲一具  
取一車載之故云視牢具諸侯大夫位尊雖無三命  
則有車馬之賜及天子士三命皆得有遣車諸侯  
士以下賤故無遣車也疏布綦者以簾布爲  
上蓋四面有物章之入壙置於椁之四隅

○載糗有子曰非禮也喪奠脯醢而已

鄭氏曰糧米糧也言死者不食糧也遣奠本無黍稷  
孔氏曰遣車載糧有子譏其爲失遣奠之饌無黍稷  
故遣車不合載糧喪奠脯醢而已亦有子之言言遣  
奠用牲體是脯醢之義然既夕士禮藏甗有黍稷麥  
者遣奠之外別有也澄曰有子之意言常時喪奠只  
用脯醢而已者蓋以死者不食糧也故遣奠亦只用  
牲體而不用黍稷牲體與常  
時脯醢之義同皆是用肉

○大夫不掄絞屬於池下

掄音遙絞戶  
交切屬於音燭

鄭氏曰謂池飾也掄掄翟也采青黃之間曰絞屬於  
繫也人君之柳其池繫絞繪於下而畫翟雉焉名曰  
振容又有銅魚在其間大夫去振容士去魚此無人  
君及士亦爛脫孔氏曰此明大夫葬時車飾諸侯以  
上則畫掄翟於絞屬於池下若大夫降下人君不得  
畫以掄絞屬於池下其池上則畫於掄得有掄絞也

故喪大記士亦有揄紼與大夫同但不得屬於池下

○魯人之贈也三玄二纁廣尺長終幅

廣古曠切長直亮切

鄭氏曰言失之也士喪禮下篇曰贈用制幣玄纁束孔氏曰記魯失也贈謂以物送亡人於槨中魯人雖三玄二纁而用廣尺長終幅不復丈八尺則失禮也

○醴者稻醴也甕甗簋衡實見間而后折入

甗音武簋所交切衡

戶剛切間如字折之設切

鄭氏曰此謂葬時藏物也衡當為桁所以皮甕甗之屬聲之誤也實見間藏於見外槨內也折承席也孔氏曰此是送葬所藏之物醴是稻米所為甕者盛醴甗者盛醴酒簋者盛黍稷衡者以大木為桁置於

地所以度舉甕甕之屬實見間者見謂棺外之飾言實此甕甕甕等於見外樽內二者之間也實物樽內既畢然後以承席加於樽上按既夕禮乃甕藏器於旁加見注云器用器役器也加見者器在見內也又云藏苞甕於旁注云在見外也則見內是用器役器見外是明器也此是士禮大夫以上則有入器明器也入器實明器虛按既夕禮注云折猶度也方鑿連木爲之蓋如牀而縮者三橫者五無簣甕事畢加之壙上以承抗席故謂承席陸氏德明曰見棺衣也賈氏曰見棺飾也飾則惟荒以惟荒加於柩棺柩不復見唯見此帷荒故名帷荒爲見山陰陸氏曰以實見間非止此四物以此四物該之衡讀如字其衍之橫也者

○非從柩與反哭無免於垣

免音問垣古鄧切

鄭氏曰言喪服出入非此二事皆冠也免所以代冠  
人於道路不可以無飾垆道路孔氏曰從柩謂孝子  
送葬從柩去時反哭謂孝子葬竟還時道路不可無  
飾得免而行非此二條不得免於道路也若葬還反  
哭在路則著冠至郊乃著免故小記云  
遠葬者比反哭皆冠及郊而后免是也

○弔非從主人也四十者執紼鄉人五十者從反哭四  
十者待盈坎

鄭氏曰言弔者必助主人之事從猶隨也成人二十  
以上至四十丁壯時非鄉人則長少皆反優遠也孔  
氏曰弔喪者本是來助事非爲空隨從主人而已既  
助主人故使年二十以上至四十強壯者皆執紼鄉  
人同鄉之人也五十始衰故待主人變竟反哭從孝  
子反也四十強壯不得卽反故待土滿坎而反若非

鄉人則無問長

少皆從主人歸

相趨也出宮而退相揖也哀次而退相問也既封而退

相見也反哭而退朋友虞附而退

封音定又如字

鄭氏曰此弔者恩薄厚去遲速之節也相趨謂相聞姓名來會喪事也相揖嘗會於它也相問嘗相惠遺也相見嘗執摯相見也附皆當爲附孔氏曰相趨本不相識情既輕故柩出廟之宮門而退相揖恩微深故待出至大門外哀次而退相問恩轉深故竟而退相見恩轉厚故葬竟孝子反哭至家而退朋友疇昔情重故至主人虞祔乃退然與死者相識亦當有弔禮知生者弔知死者傷注云弔則知是弔生人也

右記葬前宅以後之事凡十三節

士三月而葬是月也卒哭大夫三月而葬五月而卒哭諸侯五月而葬七月而卒哭士三虞大夫五諸侯七

鄭氏曰尊卑恩之差也天子至士葬卽反虞孔氏曰大夫以上葬與卒哭異月者以其位尊念親哀情於時長遠士職卑位下禮數未申故葬罷卽卒哭檀弓云葬日虞弗忍一日離也不顯尊卑是貴賤同然山陰陸氏曰卒哭遲速不同則以其德服喪有隆殺也

○上大夫之虞也少牢卒哭成事附皆大牢下大夫之

虞也犴牲卒哭成事附皆少牢

少大皆去聲犴音特

鄭氏曰卒哭成事附言皆則卒哭成事附與虞異矣下大夫虞以犴牲與士虞禮同與孔氏曰上大夫乎

常吉祭用少牢虞依常禮也卒哭謂之成事成吉事也附附廟也二祭皆大並加一等用大牢也下大夫吉祭用少牢虞祭降一等用特牲卒哭附依常吉祭禮鄭以士虞禮云三虞卒哭它用剛日先儒以此三虞卒哭同是一事鄭以此虞與卒哭其牢既別明卒哭與虞不同也方氏曰位有上下故禮有隆殺山陰陸氏曰禮士虞用特豕今下大夫之虞亦云特牲則容父爲士子爲下大夫其祭如此於上大夫言父爲大夫於下大夫言父爲士相備也

○重既虞而埋之

重平聲

鄭氏曰就所倚處埋之孔氏曰接既夕禮初喪朝禭廟重止于門外之西不入謂將嚮祖廟若過之然也明日自禭廟隨至祖廟庭厥明將出之時重出自道左倚之就所倚之處埋之謂於祖廟門外之東也



○暢曰以桷杵以梧杙以桑長三尺或曰五尺畢用桑

長三尺刊其柄與末

暢勅亮切曰其救切桷弓六切杵昌呂切杙音匕長直亮切

鄭氏曰曰杵所以擣鬱也桷柏也杙所以載牲體者此謂喪祭吉祭杙用棘畢所以助主人載者刊猶削也孔氏曰此明吉凶暢曰及杙畢之義暢謂鬱也桷柏爾雅釋木文梧桐也以柏爲白以桐爲杵擣鬱也爲柏香桐潔白於神爲宜也牲體從鑊以杙升之於鼎從鼎以杙載之於俎知吉祭杙用棘者特牲記杙用棘心是也主人舉肉則用畢助主人舉肉用桑者亦喪祭也吉時亦用棘末頭亦削之杙亦當然長樂陳氏曰匕之別有四有黍稷之匕有疏匕有喪匕三匕以棘喪匕以桑廩人之所概黍稷之匕也饗人之所概牲體之匕也牲體之匕挑匕也其制則黍稷之匕小於挑匕挑匕挑匕小於疏匕何則敦之量不過三

豆而高不過一尺則黍稷之匕小矣挹之以挑匕然後注于䟽匕者三則䟽匕大矣噉器曰畢祭器亦曰畢皆象畢星也詩曰兕觥其觶角弓其觶有觶棘匕有球天畢球者曲而長也則畢之狀可知矣鄭氏云畢狀如匕喪匕用桑而畢亦桑則吉匕用棘而畢亦棘匕畢同材然桑黃棘赤各致其義舊圖謂匕畢皆漆之誤矣特牲主人及佐食舉牲鬯宗人執畢先入贊者錯俎加匕鄭氏謂主人親舉則宗人執畢導之以畢臨匕戴備失脫也少牢及虞禮無匕何哉少牢大夫不親舉虞祭主人未執事也

○祭稱孝子孝孫喪稱哀子哀孫

鄭氏曰各以其義稱孔氏曰祭吉祭也謂自卒哭以後之祭吉則申孝子之心祝辭云孝也或子或孫隨其人喪謂自虞以前凶祭也痛慕未申故稱哀子哀孫士虞禮稱哀子卒哭乃稱孝子方氏曰祭所以追

養而盡於一身之終喪所以哭泣而止於三年孝則爲人子孫終身之行也故子孫之於祭必稱孝哀則發於聲音見於衣服蓋三年之禮而已故子孫之於喪止稱哀

○自諸侯達諸士小祥之祭主人之酢也齊之衆賓兄

弟則皆啐之大祥主人啐之衆賓兄弟皆飲之可也

音酢

昨齊才細切  
啐七內切

鄭氏曰齊啐皆嘗也齊至齒啐入口孔氏曰此明喪祭飲酒之儀正祭之後主人獻賓長賓長酢主人主人受酢則齊之衆賓及兄弟祭末受獻之時啐之差輕故也大祥主人受賓酢啐之衆賓兄弟受獻皆飲之可也知此主人之酢非受尸酢者以士虞禮主人主婦獻尸受酢之時皆卒爵虞祭比小祥爲重尚卒

爵小祥祭主人受尸酢何得唯嘑之而已神惠爲重  
受尸酢雖在喪亦卒爵賓禮爲輕受賓酢但嘑之皇  
氏云主人之酢謂受尸  
酢與士虞禮違非也

○凡侍祭喪者告賓祭薦而不食

鄭氏曰薦脯醢也吉祭告賓祭薦賓既祭而食之喪  
祭賓不食孔氏曰侍謂相於喪祭禮者喪禮不主飲  
食故相者告賓但祭其薦不食之也此謂練祥祭虞  
祔不獻賓也方氏曰祭之而不食者哀而不忍故也

○祥主人之除也於夕爲期朝服祥因其故服

鄭氏曰爲期爲祭期也至明日而祥祭亦朝服始卽  
吉正祭服也喪服下記曰除成喪者其祭也朝服縗  
冠是也祭猶縗冠未純吉也既祭乃服大祥素縗麻  
衣釋禭之禮云玄衣黃裳則是禭祭玄冠矣黃裳者

未大吉也既祭乃服禪服朝服綬冠踰月吉祭乃玄  
冠朝服既祭玄端而居復平常也孔氏曰祥謂祥祭  
主人除服之節於祥祭前夕預告明日祥祭之期此  
時主人著朝服謂緇衣素裳其冠則緇冠也明旦祥  
之時主人因著其前夕故朝服也於練祭不著祭服  
於此祥時正著祭服故注云正祭服純吉朝服玄冠  
今緇冠故云未純吉祥祭雖訖哀情未忘加著緇冠  
素純麻衣鄭引問傳大祥素緇麻衣是也禫禮玄衣  
黃裳玄冠大吉當玄衣素裳今用黃裳故云未大吉  
也禫祭後著朝服綬冠踰月吉祭乃玄冠朝服則天  
子諸侯以下各依本官吉祭之服也從祥至吉服有  
六祥祭朝服緇冠一也祥訖素緇麻衣二也禫祭玄  
冠黃裳三也禫訖朝服綬冠四也踰月吉祭玄冠朝  
服五也既祭玄端而居六也山陰陸氏曰嫌於夕爲  
期嘗朝服矣詰朝不復反喪服故云爾然則祥之日  
猶服練服及祭易之所謂除成喪者其祭也朝服緇

冠是也祭已又易之所  
謂大祥素縞麻衣是也

○子游曰既祥雖不當縞者必縞然後反服

鄭氏曰謂有以喪事贈賻來者雖不及時猶變服服祥祭之服以受之重其禮也其於此時始弔者則衛將軍文子之爲之是矣反服反素縞麻衣也孔氏曰既祥謂大祥後弔者來晚不正當祥祭縞冠之時主人必須反著此祥祭縞冠受來弔者之禮然後反服大祥素縞麻衣之服山陰陸氏曰此言親喪雖既祥猶有它喪未除今以祥故無所不用縞縞既祥之服也然後反服反它喪之服

○凡喪服未畢有弔者則爲位而哭拜踊

鄭氏曰客始來主人不可以殺禮待之孔氏曰未畢謂喪服將終猶有餘日未滿有人始來弔當爲位哭

踊不以穀禮待新弔之  
賓也言凡者五服悉然

○有父之喪如未沒喪而母死其除父之喪也服其除

### 服卒事反喪服

鄭氏曰沒猶竟也除服謂祥祭之服也卒事既祭反  
喪服服後死者之服孔氏曰此明先有父喪而後遭  
母死爲父變除之節未沒喪者謂父喪小祥後大祥  
前未竟之時于時又遭母喪母既葬後值父大祥除  
服以行祥事祥竟更還服母服也若母未葬而值父  
二祥則不得服其祥服二祥之祭爲吉未葬爲凶故  
未忍凶時行吉禮張子曰如有服則服其服雖總小  
功之服亦服新而脫舊以往時暫故也反則如常方  
氏曰服除服而後反  
喪服示前喪有終也

雖諸父昆弟之喪如當父母之喪其除諸父昆弟之喪也皆服其除喪之服卒事反喪服

鄭氏曰雖有親之大喪猶爲輕服者除骨肉之恩也唯君之喪不除私服言當者期大功之喪或終始皆在三年之中小功總麻則不除殤長中乃除孔氏曰此明諸父兄弟之喪當父母服內變除之節父母服內其諸親除喪亦爲服除服除竟反先服此亦謂重喪葬後之時也曾子問曰大夫士有私喪可以除之矣而有君服焉其除之也如之何孔子曰有君喪服於身不服私服又何除焉是有君服不得除已私服其私謂父母已下及諸父昆弟皆不得除也服問云總之麻不變小功之葛小功之麻不變大功之葛據此言之是尋常小功總麻不得爲小功總麻除服也又服知有大功以上之服不得爲小功總麻除服也又服



問云殤長中變三年之葛既變三年之葛明在大功服中爲殤長中著服而又爲之除也

# 如三年之喪則既顙其練祥皆行

顙苦迴切

鄭氏曰言今之喪既服顙乃爲前三年者變除而練祥祭也此謂先有父母之服今又喪長子者其先有長子之服今又喪父母其禮亦然然則言未沒喪者已練祥矣顙草名無葛之鄉去麻則用顙孔氏曰此明後喪既受葛之後得爲前喪練祥既顙者謂後喪既虞卒哭合變麻爲葛顙也後喪既顙之後其前喪須練祭祥祭皆舉行之云既顙不云未沒喪則知既顙與未沒喪者別既顙是既虞受服之時未沒喪是既練之後也庾氏云鄭注先有長子之服今又喪父母當云又喪母不得並稱父依禮父在不得爲長子三年也後喪既顙前喪練祥皆行若後喪既殯得爲前喪虞祔山陰陸氏曰凡喪服皆麻練而葛蓋禫而

後顓顓吉服也。知然者，以彼顓黼衣錦尚絀，知也。三年重服，故雖當既顓其練祥，猶行鄭氏謂未沒喪者已練祥矣。鄉當父母之喪，未練祥也。然則既顓在禫之後明矣。澄按古字聲同者多，借用故縗麻之縗與單縗之縗並通。作顓鄭氏以顓爲代葛之縗是矣。陸氏以此爲單縗之縗，而謂顓乃禫後之吉服，且引詩衣錦尚縗，儀禮被顓黼爲證。詩之縗衣禮之顓黼，皆婦人之服，加于正服之上，以禦道路之塵者。至夫家則脫去，豈可指爲男子常服之吉服哉？若欲言禫後吉服，何不言玄冠而乃言顓乎？陸農師於禮注正救甚多，但時或好新尚奇，以破鄭說而不自知其失當也。

有三年之練冠，則以大功之麻易之，唯杖屨不易。

鄭氏曰：謂既練而遭大功之喪者也。練除首經要經，葛又不如大功之麻重也。言練冠易麻，互言之也。唯

杖屨不易言其餘皆易也屨不易者練與大功俱用  
繩爾孔氏曰此謂遭三年之喪至練時首經已除故  
特云冠若初死者是降服大功則以此大功之麻易  
三年之練也此特據降服大功其餘七升八升九升  
之大功則不得易三年之練也大功無杖無可改易  
斬衰既練要經與大功初死要經麤細同斬衰是葛  
大功是麻故鄭云不如大功之麻重也云練冠易麻  
互言之者麻謂經帶大功言經帶明三年練亦有經  
帶三年練云冠明大功亦有冠是大功冠  
與經帶易三年冠及經帶故云互言之

○父母之喪將祭而昆弟死既殯而祭如同宮則雖臣  
妾葬而后祭祭主人之升降散等執事者亦散等雖虞  
附亦然

鄭氏曰將祭謂練祥也言若同宮則是昆弟異宮也古者昆弟異居同財有東宮有西宮有南宮有北宮有父母之喪當在殯宮而在異宮者疾病或歸者主人適子散等栗階爲新喪略威儀孔氏曰將祭謂將大小祥祭而有兄弟死則殯後乃祭兄弟輕故殯後便可行吉事此謂異宮者耳若同宮雖臣妾之輕卑死猶待葬後乃行父母祭也喪服傳曰有死於宮中則爲之三月不舉祭祥祭已涉於吉尸柩至凶故不可以相干虞祔則得爲之若喪柩卽去者則亦祭不待三月也吉祭則涉級聚足喪祭則栗階此二祥祭宜涉級爲有兄弟喪少威儀故散等也散栗也等階也助執祭者亦栗階主人至昆弟虞附而行父母二祥祭執事者亦栗階栗階謂升一等而後升不連步也故燕禮記云栗階不過二等注云其始升猶聚足連步越二等左右足各一發而升堂

○有父母之喪尚功衰而附兄弟之殯則練冠附於殯  
稱陽童某甫不名神也

鄭氏曰此兄弟之殯謂大功親以下之殯也斬衰齊  
衰之喪練皆受以大功之衰此謂之功衰以是時而  
附大功親以下之殯輕不易服冠而兄爲殯謂同年  
者也兄十九而死已明年因喪而冠陽童謂庶殯也  
宗子則曰陰童童未成人之稱也某甫且字也尊神  
不名爲之造字孔氏曰此明已有父母之喪練後得  
附兄弟小功之殯也已已有父母喪猶尚身著功衰今  
兄弟有殯在小功者當須附祭則不改練時之服身  
著練冠附祭於殯也大功正服則變三年之練故鄭  
知此是大功以下之殯言以下兼小功也已祖之  
適孫若附大功兄弟長殯得在祖廟若附小功兄弟  
長殯則是祖之兄弟之後所以得附者已是曾祖之

適其小功兄弟同曾祖今小功兄弟當祔於從祖之廟其小功兄弟身及父是庶人不合立祖廟則曾祖適孫爲之立壇祔小功兄弟之長殤於從祖立神而祭也當祔祭此殤之時其祝辭稱此殤曰陽童又稱此殤曰某甫所以不呼其名者尊神之也故爲之造字稱曰某甫曾子問庶子之殤祭於室白故曰陽童宗子殤死祭於室與則曰陰童檀弓云五十以伯仲是正字二十之時曰某甫是且字言且爲之立字也鄭云冠而兄爲殤謂同年者此鄭自難云弟冠而兄得爲殤謂弟與兄同年十九也云兄十九而死已明年因喪而冠者此新死之兄既是小功之服不合變三年之練而得有因喪冠者謂已明年之初用父母喪之練節而加冠以後始祔兄弟也云爲之造字者以冠始有字此兄去年已死未得有字祔時爲之造字也張子曰有父母之喪尚功衰謂未祥猶衣所練之功衰未衣麻衣也呂氏曰上言有三年之練冠則

以大功之麻易之唯杖屨不易此謂三年既練遭大功之喪當易練冠練衣而服大功之衰又加首經以麻易葛帶所不易者杖屨而已然此三年者統言父母君長子及爲人後及適孫爲祖之類若父母之喪既練而祔兄弟之殤則杖屨與練冠俱不易此一節於三年練冠中特爲父母立例蓋大功之衰有重於三年之練冠故所不易者唯有杖屨兄弟之殤雖亦大功然既殤且祔宜輕於父母之練故此之三年所不易者又有練冠也功衰者卒哭所受六升之服也既練則以功衰之布練而爲衣故猶曰功衰此不曰練而曰功衰者爲下練冠立文也言尚者明受功衰之日已遠故知爲練服也若哭兄弟之殤則必易練冠蓋殤之喪雖無卒哭之稅至于祔宜有殺矣

○王父死未練祥而孫又死猶是附於王父也

鄭氏曰未練祥嫌未祫祭序於昭穆爾王父既祔則孫可祔焉猶當爲由由用也孔氏曰禮孫死祔祖若祖喪雖未二祥而孫死則孫亦得用是祔禮祔於祖也按穀梁傳云於練焉壞廟易檐可也改塗可也此言練時壞祖與高祖之廟改塗易檐示有壞意以其先祖入於大祖之廟其祖傳入高祖廟其新死者入祖廟是練時遷廟也三年喪畢祫於大祖廟是祥後祫也云未練祥兼言祥者恐未祫故也但祖祔祭之後卽得祔新死之孫然王父雖祔未練無廟孫得祔於祖其孫就王父所祔祖廟之中而祔祭王父焉山陰陸氏曰猶之言嫌不祔也未練祥嫌未卒哭據周卒哭而祔嫌未卒哭曰未練足矣今日未祥亦嫌未祥可以祔也

○男子附於王父則配女子附於王母則不配



鄭氏曰配謂并祭王母不配則不祭王父也有事於尊者可以及卑有事於卑者不敢援尊配與不配祭饌如一祝辭異不言以某妃配某氏爾女子謂未嫁者也嫁未三月而死猶歸葬於女氏之黨孔氏曰男子祔於王父并祭所配王母在室之女及已嫁未三月而死祔祭於王母則不祭所配之王父按大夫少牢禮祝辭云以某妃配某氏士特牲禮祝辭云用薦歲事于皇祖某子是不言配特牲雖是常祭容是禋月吉祭故不言配

○大夫附於士士不附於大夫附於大夫之昆弟無昆弟則從其昭穆雖王父母在亦然

鄭氏曰大夫附於士不敢以已尊自殊於其祖也士不附於大夫自卑別於尊者也大夫之昆弟謂爲士

者也從其昭穆中一以上祖又祖而已附者祔於先死者孔氏曰祖爲士孫爲大夫若死可以附祭於祖之爲士者先祖爲大夫孫爲士而死不可附祭於大夫唯得附於大夫之兄弟爲士者祖無昆弟爲士則從其昭穆附於高祖爲士者高祖爲大夫則附於高祖昆弟爲士者若孫死之後應合附於王父王父見在無可附亦如是附於高祖也鄭恐大夫之昆弟俱作大夫士亦得附之故云謂爲士者中一以上謂自祖以上間一世各當昭穆而祖附之若不得附祖則間去曾祖一世附於高祖若高祖無可附則附高祖之祖是祖又祖也

婦附於其夫之所附之妃無妃則亦從其昭穆之妃妾附於妾祖姑無妾祖姑則亦從昭穆之妾

鄭氏曰夫所附之妃於婦則祖姑孔氏曰婦之所附義與夫同孫婦附祖姑無妃謂無祖姑亦間一以上附於高祖之妃無則附於高祖之祖妃若其祖有昆弟之妃班爵同者亦附之應氏曰重昏姻之正耦故婦與妾之附各以其類無之則越次而間升

### 公子附於公子

鄭氏曰不敢戚君孔氏曰公子之祖爲君公子不敢附之附於祖之兄弟爲公子者

### ○君薨太子號稱子待猶君也

鄭氏曰謂未踰年也雖稱子與諸侯朝會如君矣魯僖公九年癸卯之會宋襄公稱子而與諸侯序孔氏曰天子君存稱世子今君既薨故稱子與諸侯並列其待之禮猶如正君若踰年則稱君也

○大夫次於公館以終喪士練而歸士次於公館

鄭氏曰公館公宮之舍也練而歸之士謂邑宰也練而猶處公館朝廷之士也唯大夫三年無歸孔氏曰大夫恩深祿重故爲君喪居廬終喪乃還家邑宰之士恩輕又爲君治邑久不歸卽廢職故至小祥反其所治邑朝廷之士雖輕而無邑事故亦留次公館三年也

大夫居廬士居堊室

鄭氏曰謂未練時也士居堊室亦謂邑宰朝廷之士居廬孔氏曰大夫位尊恩重故居廬士位卑恩輕故居堊室士若非邑宰當與大夫同居廬

○卿大夫疾君問之無筭士壹問之君於卿大夫比葬

不食肉比卒哭不舉樂爲士比殯不舉樂

比必利切

孔氏曰按喪大記君於大夫疾三問之此無算謂有師保恩舊之親或三問謂君自行無算謂遣使也

### 右記葬後終喪以前之事凡二十節

曾申問於曾子曰哭父母有常聲乎曰中路嬰兒失其母焉何常聲之有

鄭氏曰嬰猶驚彌也言其若小兒亡母啼號安得常聲乎所謂哭不依廬陵胡氏曰孔子不取弁人孺子泣而此取嬰兒哭者此泛問哭故舉重謂始死時也彼在襲斂當哭踊有節故異

○孔子曰少連大連善居喪三日不怠三月不解期悲

哀三年憂東夷之子也

少去聲解  
佳買切

鄭氏曰言其生於夷狄而知禮也怠惰也解倦也孔氏曰三日不怠謂親之初喪三日內水漿不入口之屬三月不解者未葬前朝夕奠及哀至則哭之屬期悲哀謂練以來常悲哀朝夕哭之屬三年憂者以服未除憔悴憂戚馬氏曰中國者禮義之所在而蠻夷者不可以禮義責也然而少連大連之善居喪雖曾閔之至孝亦不過如是孔子稱之曰東夷之子非特美其能行禮又美其能變俗也論語謂柳下惠少連降志辱身言中倫行中慮少連之行可與柳下惠爲徒則豈特如孟獻之加於人一等而已哉

○子貢問喪子曰敬爲上哀次之瘠爲下顏色稱其情戚容稱其服請問兄弟之喪子曰兄弟之喪則存乎書

策矣

稱尺證切

鄭氏曰問喪問居父母之喪也喪尚哀言敬爲工者疾時尚不能敬也容威儀也孝經曰容止可觀兄弟之喪存乎書策言疏者如禮行之未有加也齊斬之喪哀容之體經不能載孔氏曰言疏者禮文具載故云存乎書策齊斬之喪謂父母喪也父母至親哀容體狀經不能載顏色稱其情當須毀瘠也戚容稱其服當須憔悴也張子曰持喪敬則必哀哀則必瘠恣適非所以居喪稍不敬則哀忘之矣或謂三年致哀於君子所養得無損乎是君子之所養也居喪以敬爲上敬則一於禮也方氏曰敬足以盡禮故爲上哀足以盡情故次之瘠足以盡容故爲下顏色在乎面目而面目者情之所見也故顏色稱其情戚容稱其情而四體者服之所被也故戚容稱其服顏色稱其情者以外稱內也戚容稱其服者以本稱末也情

有悲哀降殺之別服有齊斬輕重之殊外不稱內之隆殺則爲僞本不稱末之輕重則爲野矣山陰陸氏曰凡居親之喪哀戚常浮於敬故哭泣之哀顏色之戚有圖不能畫書不能載者矣故孔子言之如此兄弟之喪存乎書策若親之喪求情於言意之表可也

○妻視叔父母姑姊妹視兄弟長中下殤視成人

長之兩切

鄭氏曰視猶比也所比者哀容居處也孔氏曰明服雖有異其哀戚輕重各視所正之親妻居廬而杖抑之視叔父母姑姊妹出適服輕進之視兄弟長中下殤服輕上從本親視其成人也方氏曰言輕重雖稍異而哀戚略同也

○視君之母與妻比之兄弟發諸顏色者亦不飲食也



孔氏曰視比也謂君之母與君之妻輕重之宜比於已之兄弟若酒食不發見於顏色者則得飲食之鄭氏曰發於顏色謂釀美酒食使人醉飽方氏曰服君之母妻比已之兄弟則服君之服比已之親可知

○縣子曰三年之喪如斬期之喪如剝

剝以漸切

鄭氏曰如斬如剝言痛之惻怛有淺深也

○三年之喪言而不語對而不問廬堊室之中不與人

坐焉在堊室之中非時見乎母也不入門疏衰皆居堊

室不廬廬嚴者也

見賢遍切

鄭氏曰言言已事也爲人說爲語在堊室之中以時事見乎母乃入門則居廬時不入門也廬哀敬之處

非有其實則不居孔氏曰大夫士言而後事行故得言已事不得爲人語說也對而不問謂有問者得對而不得自問於人此謂與有服之親若與賓客疏遠者言則問傳云斬衰唯而不對齊衰對而不言是也喪大記云練居堊室不與人居居卽坐也方氏曰言畧而語詳對應而問倡言而不語對而不問以居憂有所不暇故也廬堊室之中不與人坐亦憂之所獨也在堊室非時見乎母不入門則在廬之中非時亦有所不見也問傳曰齊衰之喪居堊室齊衰卽此所謂疏衰也以廬爲嚴故父母之喪乃居之所謂嚴者以居喪之重人不可犯也

○凡喪小功以上非虞附練祥無沐浴

鄭氏曰言不有飾事則不沐浴孔氏曰自小功以上恩重哀深自宜去飾沐浴是自飾非此數條祭事則

不自飾也言小功以上則至斬同練祥不主大功小功也若三年之喪則士虞禮云沐浴不櫛鄭注云期以下櫛可也又士虞禮云明日以其班祔沐浴櫛注云彌自飾大夫以上亦然方氏曰有祭則不可以不齊戒齊戒則不可以不沐浴

○孔子曰身有瘍則浴首有創則沐病則飲酒食肉毀

瘡爲病君子弗爲也毀而死君子謂之無子

瘍音羊創七羊切

鄭氏曰毀而死是不重親澄曰有創瘍須洗滌而不沐浴有疾病須滋養而不酒食毀遇而瘡爲病皆能傷生夫哀者本是愛親毀而傷生則是不愛身也身者親之遺體不愛身即是不愛親也故君子弗爲况毀瘡爲病不惟傷其生或致殞其生夫人之所貴乎有子者正欲其終父母之喪也毀而死則父母之有

子者無子矣無子則無人  
終父母之喪可謂孝乎

○喪食雖惡必充飢飢而廢事非禮也飽而忘哀亦非  
禮也視不明聽不聰行不正不知哀君子病之故有疾  
飲酒食肉五十不致毀六十不毀七十飲酒食肉皆爲

疑死

爲云  
偽切

方氏曰禮所以執中飢而廢事飽而忘哀皆非中道  
故皆爲非禮然送死所以當大事則飢而廢事尤非  
禮矣君子病之以其不足以當大  
事也鄭氏曰病猶憂也疑猶恐也

功衰食菜果飲水漿無鹽酪不能食食鹽酪可也

酪音  
洛食

食下  
音嗣

鄭氏曰功衰齊斬之末也酪酢截山陰陸氏曰齊斬之末者齊衰既葬斬衰既練之後方氏曰食菜果飲水漿皆聖人之中制故天下無難能之病焉呂氏曰功衰亦卒哭之受服間傳父母之喪既虞卒哭疏食水飲不食菜果其飲不加鹽酪不能食食鹽酪可也者如喪大記不能食粥羹之以菜可也蓋人所不能亦不可勉也

○有服人召之食不往大功以下既葬適人人食之其

黨也食之非其黨弗食也

食之音嗣其黨也食之弗食並如字

鄭氏曰往而見食則可食也爲食而往則不可黨猶親也非親而食則是食於人無數也孔氏曰親族不

多食則其食有限若非類而輒食則無復限數必忘哀也方氏曰其黨則食之非其黨則弗食所以爲之節

○喪者不遺人人遺之雖酒肉受也從父昆弟以下既

卒哭遺人可也

爲云僞切下同

鄭氏曰言齊斬之喪重志不在施惠於人方氏曰心有所樂然後以物遺人喪以哀爲主故不遺人人遺之雖酒肉受者卻之爲不恭故也

○三年之喪如或遺之酒肉則受之必三辭主人衰絰而受之如君命則不敢辭受而薦之

孔氏曰三年之喪受酒肉雖受之猶不得食也尊者食之乃得食肉猶不得飲酒鄭氏曰受酒肉必衰經正服明不苟於滋味受而薦之於廟貴君之禮

○非爲人喪問與賜與三年之喪以其喪拜非三年之

喪以吉拜

爲云偏切

鄭氏曰言非爲人喪而問之與而賜之與此上滅脫未聞其首云何問遺也久無事曰問稽顙而后拜曰喪拜拜而后稽顙曰吉拜謂受問受賜者也孔氏曰平敵曰問卑下則賜與語助也豈非爲人有喪而問遺之與而賜與之與方氏曰喪拜吉拜皆爲拜賜與問也

○疏衰之喪既葬人請見之則見不請見人小功請見

人可也大功不以執摯唯父母之喪不辟涕泣而見人

辟音避

鄭氏曰言重喪不行求見人爾人來求見已亦可以見之矣不辟涕泣言至哀無飾也孔氏曰小功輕可請見於人大功不可也文承疏衰既葬之下則此小功亦謂既葬也凡言見人謂與人尋常相見不論執摯之事不辟涕泣豈謂執摯見人乎方氏曰人請見之則見不請見人者以人請見在彼請見人在此故也執摯則請見人之禮也

○三年之喪祥而從政期之喪卒哭而從政九月之喪既葬而從政小功總之喪既殯而從政



鄭氏曰以王制言之此謂無人也從政從爲政者教令謂給繇役孔氏曰王制云父母之喪三年不從政齊衰大功三月不從政與此不同者此庶人依士禮卒哭與既葬同三月故王制省文總云三月也若大夫士三年之喪期不從政是正禮也卒哭金革之事無辟是權禮也

○三年之喪雖功衰不弔自諸侯達諸士如有服而將往哭之則服其服而往

鄭氏曰功衰既練之服也諸侯服新死者之服而往哭謂所不臣也孔氏曰三年之喪小祥後衰與大功同故曰功衰衰雖外輕而痛猶內重故不得弔人也自諸侯達諸士謂貴賤同也功衰雖不弔人如有服謂自有五服之親喪則往哭之將往哭則不著己功衰而依彼親之節以服之申於骨肉之情故也然諸

侯絕期不應有諸親始死服今云服而往當是  
敵體及所不臣者謂始封君不臣諸父昆弟也

期之喪十一月而練十三月而祥十五月而禫練則弔

鄭氏曰謂父在爲母功衰可以弔人者以父在故輕  
於出也然則凡齊衰十一月皆可以出矣孔氏曰大  
祥始除衰杖而練得弔人者以父在而得出則其餘  
喪雖無父亦得出也母喪至練既可諸父灼然故云  
皆可以出

既葬大功弔哭而退不聽事焉期之喪未葬弔於鄉人  
哭而退不聽事焉功衰弔待事不執事小功總執事不

與於禮  
與音預

鄭氏曰聽猶待也事謂襲斂執紼之屬期之喪謂爲姑姊妹無主殯不在己族者不與於禮謂饋奠也孔氏曰身有大功之喪既葬往弔它喪弔哭既畢則退不待主人襲斂之事期喪練弔亦然期之喪謂姑姊妹無主爲之服期未至於葬往弔鄉人之喪亦哭畢則退不待襲斂也此姑姊妹期喪既葬受以大功衰謂之功衰此後若弔於鄉人其情稍輕於未葬得待襲斂但不親自執事前云大功既葬始得弔人此期喪未葬已得弔人知此期服輕是姑姊妹無主在它族成婦日久殯在夫族者也執事擯相也總小功服輕故未葬便可弔人亦爲彼擯相但不得助彼饋奠爾呂氏曰功衰字下脫一不字此謂卒哭之受服澄按從孔疏其義爲長

○以喪冠者雖三年之喪可也既冠於次入哭踊三者

三乃出

冠去聲  
下同

鄭氏曰言雖者明齊衰以下皆可以喪冠也始遭喪以其冠月則喪服因冠矣非其冠月待變除卒哭而冠次廬也孔氏曰將冠值喪當成服時因喪服加冠非但輕服得冠雖有三年重喪亦可因喪服而冠故云可也冠於次謂加冠於廬次之中若齊衰以下加冠於次舍之處冠後入於喪所哭而踊踊每哭一節三踊如此者三凡九踊乃出就次所夏小正冠用二月若正月遭喪則二月不得因喪而冠必待變除受節服之

○大功之末可以冠子可以嫁子父小功之末可以冠子可以嫁子可以取婦已雖小功既卒哭可以冠取妻

# 下殤之小功則不可

鄭氏曰此皆謂可用吉禮之時父大功卒哭而可以冠子嫁子小功卒哭而可以取婦已大功卒哭而可以冠子小功卒哭而可以取妻必偕祭乃行也下殤小功齊衰之喪除喪而後可爲昏禮凡冠者其時當冠則因喪而冠之孔氏曰大功謂已有大功之喪末謂卒哭之後取婦有酒食之會集鄉黨僚友涉近歡樂故小功之末乃可得爲也但大功據已身不云父小功據其父不云身互而相通故鄭注同之謂父及己身俱有大功之末小功之末父是大功之末己亦是大功之末乃得行此冠子嫁子父小功之末己亦小功之末可以嫁取必父子俱然乃得行事故云必偕祭乃行知父子俱大功小功者若姑姊妹出適父子俱爲大功從祖兄弟父子俱爲小功其服同也若父齊衰子大功則不可若父大功子小功可以冠嫁

未可取婦必父子俱小功之末可以取婦若父小功已總麻灼然合取可知下殤小功謂本齊衰重服降在小功不可冠嫁其餘小功可以冠取若其齊衰長殤中殤降在大功理不可冠嫁矣云大功小功之末可以吉冠則大功小功之初當冠之時因喪服而冠之鄭以前三年之喪可冠於此復明輕喪亦可冠也山陰陸氏曰父小功之末謂小功服之在父行者若從祖父母從姊妹從祖父祖母從祖祖姑是也大功之末在卑行者若孫及從父兄弟從父姊妹兄弟之子婦是也大功之末不言可以取婦不可以取婦也已雖小功既卒哭可以冠取妻言主冠取者雖在可以主之域然其冠取者若有小功未卒哭亦不可張子曰疑大功之末可以冠子可以嫁子十二字爲衍宜直云父小功之末父小功則是已總麻之末也故可以冠取蓋冠取者固已無服矣凡卒哭之後皆是末也已雖小功既卒哭可冠取妻是已自冠取也范

氏曰五服之制各有月數月數之內自無吉事故曰  
衰麻非所以接升冕也春秋左氏傳齊侯使晏子請  
繼室於晉叔向對曰寡君之願也衰經之中是以未  
敢請時晉侯有少姜之喪耳禮貴妾總而叔向稱在  
衰經之中推此而言雖輕喪之麻猶無昏姻之道也  
而敦本敬始之義每於昏冠見之矣雖記云大功之  
末可以嫁子小功之末可以取婦下云己雖小功卒  
哭可冠取妻也尋此二文爲男女失時或繼嗣未立  
者爾非通例也己有總麻之喪於  
祭亦廢昏亦不通矣况小功乎

○父有服宮中子不與於樂母有服聲聞焉不舉樂妻  
有服不舉樂於其側大功將至辟琴瑟小功至不絕樂

與音預聞音問又如  
字辟音避又音闕

鄭氏曰宮中子與父同宮者也禮由命士以上父子異宮不與於樂謂出行見之不得觀也將至來也辟琴瑟亦所以助哀孔氏曰若異宮則得與於樂崔氏云父有服齊衰以下之服也若重服則期後猶有子姓之冠自不當與於樂山陰陸氏曰自士上達父有服有作樂者宮中雖不聞子不敢與也母有服聲聞焉不敢舉樂妻有服於其側不舉爾所謂不與於樂非直不舉也長樂陳氏曰父有服宮中子不得與於聞樂况舉樂乎母有服不得以舉樂雖聲聞焉可也妻有服不舉樂於其側不於其側雖舉之可也母殺於父而妻又殺於母也樂不止於琴瑟琴瑟特常御者而已大功之親有服其將至則雖辟琴瑟可也未至則不辟矣小功之親有服雖至不絕樂若夫已有小功之喪議而及樂又禮之所弃也

○卒哭而諱王父母兄弟世父叔父姑姊妹子與父同



諱母之諱宮中諱妻之諱不舉諸其側與從祖昆弟同

名則諱

從才用切

鄭氏曰自卒哭鬼神事之尊而諱其名王父母以下之親諱是謂士也父爲其親諱則子不敢不從諱天子諸侯諱羣祖母之所爲其親諱子孫於宮中不言妻之所爲其親諱夫於其側亦不言也孝子聞名心懼凡不言人諱者亦爲其相感動也子與父同諱則子可盡曾祖之親也從祖昆弟在其中於父輕不爲諱與母妻之親同名重則諱之孔氏曰卒哭前猶以生禮事之卒哭後去生漸遠故諱其名王父母謂父之王父母於己爲曾祖父母正服小功不合諱以父爲之諱子亦同父諱之兄弟謂父之兄弟於己爲伯叔正服期父亦爲之期是子與父同有諱也世父叔父是父之世父叔父於己是從祖正服小功姑謂父

之姑於己從祖姑在家正服小功出嫁總麻二者皆不合諱以父爲之諱故己從父而諱也姊妹謂父姊妹於己爲姑在家正服期出嫁大功九月是己與父同爲之諱此等是子與父同諱也鄭注子不敢不從諱據王父母世父叔父及姑已不合諱者言之父之兄弟及姊妹已爲合諱不假從父而諱也鄭注是謂士也士謂父身以父身是士故諱王父若是庶人子不逮事父母則不諱王父母也天子七廟諸侯五廟故知諱羣祖妻之所爲其親諱但不得在側言之於宮中遠處得言之母與妻二者之諱與己從祖昆弟同名則爲之諱不但宮中旁側其在餘處皆諱之也父爲王父諱於子則爲曾祖父之伯叔及姑是子曾祖之親故注云子與父同諱則子可盡曾祖之親也從祖昆弟共同會祖之親故注云在其中澄曰注云從祖昆弟於父輕不爲之諱與母妻之親同名重則諱之者蓋己之從祖昆弟父之從父昆弟之子也於

父爲子行屬卑且疏父服小功其服輕父不爲諱故子亦不從諱若此從祖昆弟之名與母妻之親名同而相重則爲母妻之親諱而因爲之諱爾非正爲從祖昆弟而諱也

○君子不奪人之喪亦不可奪喪也

鄭氏曰不奪人喪重喪禮也不可奪喪不可以輕之於己也孔氏曰它人居喪任其行禮不可抑奪自己居喪當須依禮不可自奪其喪使不如法不奪人喪恕也不奪己喪孝也

○親喪外除兄弟之喪內除

鄭氏曰親喪日月已竟而哀未忘兄弟之喪日月未竟而哀已殺孔氏曰親喪謂父母之喪外謂服也服隨日月漸除而心哀未忘兄弟謂期服及小功總也內謂心也服制未釋而心哀先殺由輕故也長樂黃

氏曰若日月未竟而哀先殺是不終喪也內除外除皆言日月已竟服重者外雖除而內未除服輕者不唯外除而內亦除也

○免喪之外行於道路見似目瞿聞名心瞿弔死而問疾顏色戚容必有以異於人也如此而后可以服三年

之喪其餘則直道而行之是也

瞿俱遇切

鄭氏曰惻隱之心能如是則其餘齊衰以下直道而行盡自得也似謂容貌似其父母也名與親同孔氏曰除喪之後若見它不形狀似其親則目瞿然聞它人所稱名與父名同則心中瞿然上云目瞿此應云耳瞿耳狀難名惻隱之慘本瞿於心故直云心瞿異於人謂殊異於無喪之人餘行皆應如此以弔死問

疾是哀痛之處身又除喪戚容應甚故舉弔死問疾  
言也其餘謂期親以下直道而行直依喪之道理而  
行也父在爲母雖期年亦從上三年之內也廬陵胡  
氏曰路隋父死母告以貌類父終身不引鏡近於目  
瞿劉溫叟父名岳終身不聽絲竹近於心瞿山陰陸  
氏曰其餘百行推此而直前則是矣故曰執一術而  
百善至者  
孝之謂也

### 右記喪禮情文之中凡二十三節

恤由之喪哀公使孺悲之孔子學士喪禮士喪禮於是  
乎書

鄭氏曰時人轉而僭工士之喪禮已廢矣孔子以教  
孺悲國人乃復書而存之方氏曰喪禮將亡待孺悲

學之然後書明禮之不廢亦有所因也山陰陸氏曰儀禮士喪禮是歟

○泄柳之母死相者由左泄柳死其徒由右相由右相

泄柳之徒爲之也

相息亮切

鄭氏曰亦記失禮所由也泄柳魯穆公時賢人相相主人之禮孔氏曰孟子云魯穆公時子柳子思爲臣子柳卽此泄柳也相主人之禮法相者由左山陰陸氏曰由右相雖非古在可以然之域凡言自某始記失禮所由始也卽言爲之君子有取焉據七月而禘獻子爲之也鑿巾以飯公羊賈爲之也由右相泄柳之徒爲之也

右記喪禮存失之由凡二節

贊大行曰圭公九寸侯伯七寸子男五寸博三寸厚半寸剡上左右各寸半玉也藻三采六等

鄭氏曰贊大行者書名說大行人之禮者藻薦玉者也三采六等以朱白蒼畫之再行也子男執璧作此贊者失之孔氏曰周禮有大行人篇掌諸侯五等之禮作記之前人有書贊明大行人之事記者引之剡殺也殺上左右角各寸半謂圭也五等諸侯圭璧雖異而俱以玉爲之故云玉也藻謂以韋衣板以藉玉者三采朱白蒼也六等六行也謂三色每色爲二行是三采六等按聘禮記云朝天子圭與纁皆九寸纁三采六等典瑞云公侯伯皆三采三就子男皆二采再就謂一采爲一就其實采別二就三采則六等二采則四等又云瑒圭璋璧琮纁皆二采一就以覲聘此謂卿大夫二采共一就也天子五采五就則十等

也山陰陸氏曰聘禮記云所以朝天子圭與藻皆九寸問諸侯朱綠藻八寸蓋上言所以朝之玉下言以聘它國者也藻八寸則圭亦八寸可知故曰瑒圭璋八寸璧琮八寸以覲聘子男執璧以朝以圭聘覲今此言圭則子男聘覲之玉也所謂博三寸厚半寸刻上左右各半寸圭公言之其餘以是爲差長樂陳氏曰玉之藉以纁而纁之長祇玉五采五就色不過五也公侯伯皆三采三就降殺以兩也子男二采而大夫聘玉亦二采者禮窮則同纁或作藻纁纁織絲爲之則圭纁亦然鄭氏與杜預皆謂韋爲之亡據

○韞長三尺下廣二尺上廣一尺會去上五寸紕以爵

韋六寸不至下五寸純以素紕以五采

長廣並去聲純音準紕音馴

鄭氏曰會謂領上縫也領之所用蓋與紕同在旁曰紕在下曰純素生帛也紕六寸者中執之表裏各三



寸也純純所不至者五寸與會去上同紃施諸縫中若今時條也孔氏曰鞞鞞也長三尺與紳齊也下廣上狹象天地數旁緣謂之紃上緣謂之會以其在總會之處故謂之會鞞之領縫也此縫去鞞上畔廣五寸謂會上下廣五寸紃謂會縫之下鞞之兩邊紃以爵韋闊六寸倒攝之兩廂各三寸也不至下五寸者謂紃鞞之兩邊不至鞞之下畔闊五寸純以素者謂紃所不至之處橫純之以生帛此帛上下各闊五寸也紃條也五采之條施之於縫之中會之所用無文純紃既用爵韋故鄭知與紃同也純之上畔去鞞下畔五寸會之下畔去鞞之上畔五寸以其俱五寸故鄭云與會去上同也

○大白冠緇布之冠皆不黹委武玄縞而后黹

鄭氏曰不黹質無飾也大白冠太古之布冠也委武冠卷也秦人曰委齊人曰武玄玄冠也縞縞冠也孔

氏曰大白冠白布冠也緇布冠黑布冠也二冠無飾  
故皆不蕤此緇布冠謂大夫士之冠其諸侯則緇布  
冠續緇玄編二冠既先有別卷後乃可蕤故云而后  
蕤也大祥編冠亦有蕤前云練冠亦條屬右縫則知  
編不條屬既別安卷灼然有蕤也衛文公大白冠自  
貶損也馬氏曰冠以莊其首蕤以致其飾冠不蕤者  
上古質也冠以蕤者後代文也文公以亡國爲喪服  
故以大白始冠欲其重始而取上世之冠故以緇布  
此皆不蕤者也玄冠或以朱組纓或以丹組纓編冠  
或以玄武或以素紕此皆蕤者也山陰陸氏曰委貌  
貌也玄所謂編冠玄武編所謂玄冠編武如是而後  
緇先儒謂玄冠委貌也然則編冠素委貌歟素委貌  
蓋素端之冠

○大夫冕而祭於公弁而祭於己士弁而祭於公冠而

祭於己士弁而親迎然則士弁而祭於己可也

迎去聲

鄭氏曰弁爵弁也冠玄冠也祭於公助君祭也大夫爵弁而祭於己唯孤爾然則士弁而祭於己緣類欲許之也親迎雖亦己之事攝盛服爾非常也孔氏曰冕絺冕也祭於己自祭廟也助祭爲尊故服絺冕自祭爲卑故用自祭不敢同助君之服也作記之人以士爵弁親迎親迎輕於祭尚用爵弁則士爵弁自祭已廟於禮可用然親迎配偶一時之極故許其攝盛服爾祭祀須依班序許其著弁其理不可儀禮少牢上大夫自祭用玄冠此云弁而祭於己與少牢異故鄭云唯孤爾知非卿者以少牢禮有卿賓尸下大夫不賓尸明卿亦玄冠不爵弁也崔氏云孤不悉絺冕若王者之後及魯之孤則助祭用絺若方伯之孤助祭則玄冕以其君玄冕自祭不可踰之也馬氏曰祭之至

重者助於公祭之有常者祭於己卿大夫之服自玄冕而下士之服自爵弁而下則大夫以玄冕爲極而士以爵弁爲極也非祭於公安敢用哉然士弁而親迎昏可用弁則祭於己亦可用弁此記禮著之所疑也蓋昏者合二姓之好爲萬世之始以其至大之禮行於一時之間可以攝盛服而用弁焉士之弁而親迎猶孔子謂哀公冕而親迎者也諸侯以祭服而親迎則士以助祭服而親迎義之當然至若祭於己則歲時所用於家爲常苟不與祭於公者有辨要在其爲禮哉苟弁而祭於己非特嫌其同於公而又著其輕於昏矣故士之弁而祭於公者正也弁而親迎者權也弁而祭於己則不可士可弁而祭於己則大夫亦可冕而祭於己矣

○女雖未許嫁年二十而笄禮之婦人執其禮燕則鬢

首髻音權

鄭氏曰雖未許嫁年二十亦爲成人矣禮之酌以成之言婦人執其禮明非許嫁之笄既笄之後去之髻首猶若女有髻紒也孔氏曰女子十五許嫁而笄則主婦及女賓爲笄禮主婦爲之著笄女賓以醴禮之若未許嫁至二十而笄則婦人禮之無主婦女賓不備儀也既笄後尋常燕居則去其笄而髻首謂分髮爲髻紒也既未許嫁雖已笄猶爲少者處之

○納幣一束束五兩兩五尋

鄭氏曰納幣謂昏禮納徵也十箇爲束貴成數兩兩者合其卷是謂五兩八尺曰尋五兩五尋則每卷二丈也合之則四十尺今謂之匹猶匹偶之云與孔氏曰一束十箇也兩箇合爲一卷一兩有四十尺五尋

也

卷十一

○婦見舅姑兄弟姊妹皆立于堂下西面北上見

已見諸父各就其寢

見賢  
遍切

鄭氏曰婦來爲供養也其見主於尊者兄弟以下在位是爲已見不復特見也諸父旁尊各就其寢亦爲見時不來也孔氏曰婦來明日而見舅姑之時兄弟姊妹皆立于舅姑之堂下東邊西鄉以北爲上近堂爲尊也婦自南門而入入則從於夫之兄弟姊妹姊妹前度以因是卽爲已相見不復更別詣其室見之諸父謂夫之伯叔婦於明日各往其寢見之不與舅姑同日也

○諸侯出夫人夫人比至于其國以夫人之禮行至以

夫人入使者將命曰寡君不敏不能從而事社稷宗廟  
使使臣某敢告于執事主人對曰寡君固前辭不教矣  
寡君敢不敬須以俟命有司官陳器皿主人有司亦官  
受之

此必利切使者  
使臣並色事切

鄭氏曰行道以夫人之禮者弃妻致命其家乃義絕  
不用此爲始也前辭不教謂納采時此辭賓在門外  
擯者傳焉賓入致命如初主人卒辭曰敢不聽命器  
皿其本所齋物也律弃妻畀所齋孔氏曰夫人有罪  
諸侯出之令歸本國禮尚謙退不指斥夫人之罪故  
使者將命云寡君才知不敏不能隨從夫人共事社  
稷宗廟使使臣某告在下之執事須待也俟亦待也  
敬須待君命也使入得主人答命使從已來有司之

官陳夫人嫁時所齋器皿之屬以還主國主國亦使有司領受之並云官者明付受悉如法也

妻出夫使人致之曰某不敏不能從而共粢盛使某也  
敢告於待者主人對曰某之子不肖不敢辟誅敢不敬  
須以俟命使者退主人拜送之如舅在則稱舅舅沒則  
稱兄無兄則稱夫主人之辭曰某之子不肖如姑姊妹  
亦皆稱之

共音供盛音  
成辟音避

鄭氏曰肖似也不似言不如人誅猶罰也稱舅稱兄  
言弃妻者父兄在則稱之命當由尊者出也唯國君  
不稱兄姑姊妹見弃亦曰某之姑某之姊若妹不肖  
孔氏曰稱舅謂妻被出夫之父在則稱父名使使來



告也稱兄謂夫兄之名不云舅沒則稱母者婦人之  
名不合外接於人也夫身無兄則稱夫名夫之父兄  
遣人致命之辭未聞方氏曰夫婦之道合則納之以  
禮不合則出之以義人倫之際有所不免也故先王  
亦存其  
辭焉

○夫人之不命於天子自魯昭公始也

鄭氏曰周之制同姓百世昏姻不通吳大伯之後魯  
同姓昭公取於吳謂之吳孟子不告於天子自此後  
取者遂不告於天子天子亦不命之孔氏曰王后無  
畿外之事故天子命畿外諸侯夫人若畿內諸侯及  
卿大夫之妻則天子諸侯  
命具臣后夫人命其妻也

○凡婦人從其夫之爵位

鄭氏曰婦人無專制生禮死事以夫爲尊卑

○孟獻子曰正月日至可以有事於上帝七月日至可以有事於祖七月而禘獻子爲之也

鄭氏曰孟獻子魯大夫仲孫蔑也魯以周公之故得以正月日至之後郊天亦以始祖后稷配之獻子欲尊其祖以郊天之月對月禘之非也魯之宗廟猶以夏時之孟月明堂位曰季夏六月以禘禮祀周公於大廟孔氏曰正月周正月建子之月也日至冬至日也有事謂南郊祭帝七月周七月建午之月也日至夏至日也有事謂禘祭於祖廟魯禘於孟月於夏是四月於周爲六月獻子以二至相當以天對祖乖失禮意獻子爲之記其失所由也澄曰魯之郊上帝亦但得郊於建寅之月禘則用建巳之月獻子二言皆

非魯之郊禘本非禮獻子欲移其祭月則失禮逾甚矣山陰陸氏曰僖公蓋嘗用七月禘于大廟也

○子貢觀於蜡孔子曰賜也樂乎對曰一國之人皆若狂賜未知其樂也子曰百日之蜡一日之澤非爾所知也張而不弛文武弗能也弛而不張文武弗爲也一弛一弛文武之道也

蜡鋤駕切  
樂音洛

鄭氏曰蜡索也歲十二月合聚萬物而索饗之祭也國索鬼神而祭祀則黨正以禮屬民而飲酒于序以正齒位於是時民無不醉者如狂矣曰未知其樂怪之也蜡之祭主先畷大飲烝勞農以休息之言民皆勤稼穡有百日之勞喻久也今一日使之飲酒燕樂是君之恩澤非女所知言其義大也張弛以弓喻人

也弓弩久張之則絕其力久弛之則失其體孔氏曰  
蜡謂王者於亥月報萬物休老息農又各燕會飲酒  
於黨學中故子貢往觀之民勤稼穡其實一年而云  
百日舉其成數以喻久也張謂張弦弛謂落弦張而  
不弛則絕其弓力喻民久勞亦損民力弛而不張則  
失弓往來之體喻民久休息則志驕逸若調之以道  
化之以理張弛以時勞逸以意則文武得其中道也  
呂氏曰自秋成至于十二月有百日在百日中索是  
鬼神以修蜡禮故曰百日之蜡至十二月乃祭祭而  
遂息田夫故曰一日之澤方氏曰勞之猶弓之張息  
之猶弓之弛張之以武所以始弛之以文所以終百  
日之蜡始於春一日之澤終於冬也馬氏曰王者奉  
天牧民春夏使之耕作欲其富也能勿勞乎秋冬使  
之收成致其勞也能勿息乎不久張以著其仁不久  
弛以著其義澄曰使民常勞則民將不堪上之人不  
能強民之從也故曰文武弗能使民久逸則民將廢

業上之人不爲此以縱民  
之情也故曰文武弗爲

○孔子曰凶年則乘駑馬祀以下牲

鄭氏曰自貶損亦取易供也駑馬六種最下者下牲  
少牢若特豕特豚也孔氏曰校人馬有六種種馬戎  
馬齊馬道馬田馬此五路所乘駑馬負重載遠所乘  
凶年人君自貶乘駑馬也天子諸侯常祭大牢凶荒  
則用少牢諸侯之卿大夫常祭用少牢降用特豕士  
常祭用特豕降用特豚如此之屬皆爲下牲方氏曰  
馬不良謂之駑牲非純全謂之下山陰陸氏曰  
下牲蓋猶用其本牲之下者也故祭凶年不儉

○孔子曰管仲鏤簋而朱紼旅樹而反坫山節而藻梲  
賢大夫也而難爲上也晏平仲祀其先人豚肩不揜豆

賢大夫也而難爲下也君子上不僭上下不偪下

絃音宏枕

章悅切

鄭氏曰難爲上言其僭天子諸侯也鏤簋刻爲蟲獸也冠有笄者爲絃絃則在纓處兩端上屬下不結旅樹門屏也反玷反爵之玷也山節薄櫨刻之爲山祝侏儒柱畫之爲藻文難爲下言其偪士庶人也豚俎實豆徑尺言并豚兩肩不能覆豆喻小也孔氏曰天子冕而朱絃山節藻祝天子之廟飾邦君樹塞門邦君爲兩君之好有反玷此天子諸侯之制而管仲爲之當時謂管仲賢大夫尚爲此僭上是在管仲之上者皆被僭也故難可爲上豚在於俎豆形旣小尚不拊豆明豚小之甚不謂豚在豆也平仲賢大夫猶尚偪下是在平仲之下者恒被偪也故難可爲下

○孔子曰吾食於少施氏而飽少施氏食我以禮吾祭作而辭曰疏食不足祭也吾飧作而辭曰疏食也不敢

以傷吾子

食音嗣並同

鄭氏曰少施氏魯惠公子施父之後貴其以禮待己而爲之飽也時人佑慢若季氏則不以禮矣孔氏曰吾祭謂孔子祭也作起也飧強飯以答主人之意方氏曰賓祭與飧主人皆作而辭有禮也飧者食後更飧傷謂傷廉張子曰後世唯務簡便至如賓主相與爲禮安然不動復何相勤相敬之意但以酒食相與醉飽而已古人必自進籩豆几席酌酒而拜所以致其敬也末世雖宗廟之饗父母之養禮意猶有所闕孔子食於少施氏而飽少施氏有禮也食於季氏孔子雖欲行禮季氏必是不知故不辭不食肉而飧凡

禮必施之於知禮者  
若爲不知禮亦難行

○廡焚孔子拜鄉人爲火來者拜之士壹大夫再亦相

弔之道也

爲云  
偏切

鄭氏曰拜之者謂其來弔己宗伯職曰以弔禮哀禍  
災孔氏曰廡焚孔子馬廡爲火焚孔子拜鄉人來慰  
問者雖非大禍災亦是相哀弔之道也山陰陸氏曰  
爲爲火來者拜錄之以著聖人言動之間無所不爲  
法澄曰士一大夫再言士來者一拜  
以謝之大夫來者再拜以謝之也

○哀公問子羔曰子之食奚當對曰文公之下執事也

當如  
字



鄭氏曰問其先人始仕食祿以何君時方氏曰文公之下執事也此下宜更有辭簡脫爾

○過而舉君之諱則起與君之諱同則稱字

孔氏曰過謂過誤也鄭氏曰舉猶言也起立者失言而變自新稱字謂諸臣之名也

○內亂不與焉外惠不辟也

與音預辟音避

鄭氏曰謂卿大夫也同僚將爲亂已力不能討不與而已至於鄰國爲寇則當死之也孔氏曰力不能討謂不與國政若與國政力能討而不討則責之方氏曰門內之治恩拊義內亂不與者重恩也門外之治義斷恩外惠不辟者重義也澄曰內亂不與焉謂亂之輕小者爾爲亂者於已有兄弟之親則誅之逐之有當國政者在已以親親之恩不與聞其事可也若亂之重且大者管叔啓武庚而叛周則周公以弟誅

其兄石厚輔州吁而弑君則石  
黯以父殺其子豈得不與乎

○君子有三患未之聞患弗得聞也既聞之患弗得學  
也既學之患弗能行也君子有五恥居其位無其言君  
子恥之有其言無其行君子恥之既得之而又失之君  
子恥之地有餘而民不足君子恥之衆寡均而倍焉君

子恥之


其行  
去聲

方氏曰弗聞則無由知弗學則無由能弗行則無由  
至道始於聞而知中於學而能卒於行而至君子居  
其位將以行道道非言無自而行居其位而無其言  
是備位爾言之爲易行之爲難有其言而無其行是

空言爾君子進以禮位固不可以苟得退以義則又不可以苟失既得之而又失之則非義而退矣地廣大荒而不治士之辱也政不足以聚人則民不繁民不繁則有曠土故地有餘而民不足術不足以使人則事不逮事不逮則有廢功故衆寡均而倍焉謂彼力均於此而我功少於彼也三患之所言者道五恥之所言者事澄曰得學得行猶幼而學之之學壯而欲行之之行行謂見用於時得行其學也非行而至之行既得之而又失之按論語言雖得之必失之此以學言也又言既得之患失之此以位言也大學言得衆得國失衆失國孟子言得其民得其心失其民失其心此以土地人民言也此下言地有餘而民不足衆寡均而倍焉則此句亦是以土地人民言孟子所謂廣土衆民君子欲之是也三患之君子兼該無位有位之人五恥之君子兼該北面之臣南面之君孔氏曰人須多識若未聞知患不得聞不撫養其民

使民逃散役民衆寡彼已均等屯人功績倍多於己由不能勸課督率故皆恥之鄭氏曰恥民不足者占者量地以制邑度地以居民地邑民居必參相得也衆寡均謂俱有役事人數等也倍焉彼功倍於己也

右附記雜事雜辭凡二十節



禮記纂言卷十一